

三家詩遺說考

韓詩道說攷自序

詩之有魯齊韓毛猶春秋之有公穀鄒夾也鄒氏無師
夾氏未有書故其傳不顯於世詩則魯齊韓三家並立
學官家前戶習終兩漢之世經師稱極盛矣顧自魏晉
改代毛鄭詩行而三家之學始微韓詩雖最後亡持其
業者益寡惟杜瓊著韓詩章句十餘萬言見於蜀志張
紘從濮陽固受韓詩見於吳書崔季珪少讀韓詩就鄭
氏學見於魏志晉大康中何隨治韓詩研精文緯見於
華陽國志外此恒不數觀焉夫去聖久遠學不厭博漢
世褒顯儒術建立五經爲置博士一經之學數家競爽

凡別名家者皆增置博士各以家法教授所以扶進微學尊廣道統也後之人因陋就簡安其所習毀所不見師法既失家學就湮豈非學士大夫之過歟稽之漢書藝文志韓詩經二十八卷韓故三十六卷內傳四卷外傳六卷韓說四十一卷而隋書經籍志祇載韓詩二十二卷薛氏章句唐書藝文志則載韓詩卜商序韓嬰注二十二卷又外傳十卷然觀唐人經義及類書所引韓詩要皆薛氏章句爲多至於內傳僅散見一二焉據後漢書儒林傳言薛漢世習韓詩父子以章句著名又言杜撫少受業於薛漢定韓詩章句其所作詩題約義通

學者傳之曰杜君注疑唐書藝文志所載當卽此種故
卷數與漢志不同雖題爲韓嬰注知非太傅之舊本蓋
韓故韓說二書其亡佚固已久矣他如趙長君詩細世
雖不傳然韓詩譜二卷詩厯神淵一卷侯包韓詩翼要
十卷具列隋志是其書猶未盡佚惜當時定五經正義
專主毛詩鄭箋獨立國學韓詩雖在世所不用課士不
取人無能明之者陸元朗經典釋文間採毛韓異同而
畢淵尚多斯亦稽古者之大憾也宋元以後毛鄭詩亦
復罕有專門而韓詩之傳遂絕其廬有存者外傳十篇
而已說者因班志有取春秋采雜說咸非其本義之語

韓詩遺說攷

自序

二

遂皆其不合詩意不知董仲舒有言詩無達詁劉向亦言詩無通故讀詩之法亦貴善以意逆志耳太史公儒林傳稱韓生推詩人之意而爲內外傳數萬言其語頗與齊魯閒殊然其歸一也夫詩三百篇中邇之事父遠之事君興觀羣怨之旨於斯焉備其主文而譎諫也言者無罪聞之者足以戒善惡美刺蓋不可不察焉孟子曰王者之迹熄而詩亡詩亡然後春秋作然則詩之與春秋固相爲維持世道也子夏序詩言國史明乎得失之迹傷人倫之廢哀刑政之苛吟咏情性以諷其上達於事變而懷其舊俗者也今觀外傳之文記夫子之緒

論與春秋雜說或引詩以証事或引事以明詩使爲法
者彰顯爲戒者著明雖非專於解經之作要其觸類引
伸斷章取義皆有合於聖門商賜言詩之意也況夫微
言大義往往而有上推天人性理明皆有仁義禮智順
善之心下究萬物情狀多識於鳥獸草木之名考風雅
之正變知王道之興衰夫固天命性道之蘊而古今得
失之林耶先大夫襄撰三家詩遺說未卒其業喬樅敬
承先志於韓詩詁訓凡羣籍所徵引者旁搜博採薈萃
成帙釐爲五卷細加考証其各家所述韓詩佚說有與
毛氏文異而義仍同及文同而義或異與夫文義並同

者咸備採之以資參攷至外傳中引詩者皆散附各篇
其於詩文無所附者別爲一卷著錄於末凡以存韓氏
專家之學云爾
昔道光二十年歲在庚子侯官陳喬樞
敘于京都城南之虎坊橋試館

韓詩敘錄

侯官陳喬樞學

韓生

漢書曰
名嬰

韓商

史記儒林傳韓生者燕人也孝文帝時爲博士景帝時

爲常山王太傅

徐廣曰憲
王愛也

韓生推詩之意而爲內外傳

數萬言頗與齊魯間殊然其歸一也淮南貢生受之自

是之後而燕趙間言詩者由韓生韓生孫商爲今上博

上

涿郡韓生

漢書儒林傳韓生亦以易授人推易意而爲之傳燕趙
間好詩故其易微惟韓詩自傳之武帝時嬰嘗與董仲
舒論於上前其人精悍處事分明仲舒不能難也孝宣
時涿郡韓生其後也以易徵待詔殿中曰所受易卽先
太傅所傳也嘗受韓詩不如韓氏易深太傅故專傳之

真生

毛詩指說云賁
生傳河內趙生

趙子

漢書儒林傳趙子河內人也事燕韓生授同郡蔡誼

蔡義

漢書蔡氏傳蔡我河內溫人也以明經給事大將軍莫

府久之詔求能爲韓詩者徵義待詔久不進見義上疏
曰臣山東草萊之人行能匹所比容貌不及衆然而不
弃人倫者竊以臣聞道於先師自託於經術也願賜清
閒之燕得盡精思於前上召見義說詩甚說之擢爲光
祿大夫給事中進授昭帝數歲拜爲少府遷御史大夫
代楊敞爲丞相封陽平侯薨謚曰節侯

食子公

漢書儒林傳蔡詡授同郡食子公與王吉吉爲昌邑中
尉食生爲博士

王吉

王駿

王崇

漢書王吉傳吉字子陽瑯琊人也少時學明經
郡吏舉孝廉爲郎遷雲陽令舉賢良爲昌邑中尉而王
好遊獵驅馳國中動作無節吉上疏諫爭甚得輔弼之
義雖不治民國中莫不敬重焉久之昭帝崩亡嗣大將
軍霍光秉政迎昌邑王王旣到卽位二十餘日昌行淫
亂廢昌邑羣臣皆下獄誅唯吉昌忠直數諫正得減死
起家復爲益州刺史病去官復徵爲博士諫大夫是時
宣帝頗修武帝故事宮室車服盛於昭帝時外戚許史

王氏貴寵而上躬親政事任用能吏吉上疏言得失上以其言迂闊不甚寵異也吉遂謝病歸瑯琊元帝初卽位遣使者徵吉吉年老道卒上悼之復遣使者云初吉兼通五經能爲騶氏春秋以詩論語教授子駿以孝廉爲郎左曹陳咸薦駿賢父子經明行修光祿勳匡衡亦舉駿有專對材遷諫大夫使責淮陽憲王遷趙內史道病免官歸起家復爲幽州刺史遷司隸校尉成帝欲大用之出駿爲京兆尹試以政事代薛宣爲御史大夫居位六歲病卒駿子崇以父任爲郎歷刺史郡守治有能名建平三年以河南太守徵入爲御史大夫平帝卽位

崇爲大司空封扶平侯

栗豐

張就

長孫順

髮福

案經典釋文敘錄一本作段福

漢書儒林傳食生授泰山栗豐吉授淄川長孫順順爲博士豐部刺史由是韓詩有王食長孫之學豐授山陽張就順授東海髮福皆至大官徒衆尤盛

邳惲

邳奇

後漢書邳惲傳惲字君章汝南西平人也年十二失母
居喪過禮及長理韓詩嚴氏春秋明天文歷數王莽時
寇賊羣發惲廼仰占元象歎謂友人曰方今鎮歲熒惑
並在漢分翼軫之域去而復來漢必再受命福歸有德
如有順天發策者必成大功遂西至長安上書王莽莽
大怒收繫詔獄劾以大逆猶以惲據經識難卽害之脅
令自告狂病惲廼瞋目詈曰所言皆天文聖意非狂人
所能造遂繫須冬會赦乃出南遁蒼梧建武三年積弩
將軍傅俊徇揚州素聞惲名廼禮請之上爲將兵長史
授以軍政百姓悅服所向皆下七年俊還京師而上論

之憚恥以軍政取位遂辭歸鄉里客居江夏教授郡舉
孝廉爲山東城門候帝嘗出獵車駕夜還憚拒關不開
明日上書諫曰昔文王不敢槃於游田以萬人爲憂而
陛下遠獵山林夜以繼晷其如社稷宗廟何暴虎馮河
未至之誠小臣所竊憂也書奏賜布百匹後令憚授皇
太子韓詩侍講殿中再遷長沙太守又免歸避地教授
著書八篇以病卒子壽字伯孝善文章以廉能稱舉孝
廉稍遷冀州刺史視事三年冀土肅清三遷尚書令擢
爲京兆尹

劉寬

後漢書劉寬傳寬字文饒宏農華陰人也桓帝時大將軍辟五遷司徒長史時京師地震特見詢問再遷出爲東海相延熹八年徵拜尚書令遷南陽太守典歷三郡溫仁多恕每行縣止息亭傳輒引學官祭酒及處士諸生執經對講見老父慰以農里之言少年勉以孝悌之訓人感德興行日有所化靈帝初徵拜太中大夫侍講華光數遷侍中嘉平五年代許訓爲太尉靈帝頗好學梳每引見常令講經以先策黃巾逆謀曰事上聞封遂鄉侯六百戶中平二年卒謚曰昭烈侯子松嗣官至宗

正

謝承後漢書寬少學歐陽尚書京氏易尤明韓詩外傳
星官風鳴算歷皆究極師法稱爲通儒未嘗與人爭勢
利之事也

薛夫子

唐書宰相世系表名方
回薛廣德曾孫漢父也

薛漢

後漢書儒林傳薛漢字公子淮陽人也世習韓詩父子
以章句著名漢少傳父業尤善說災異識緯教授常數
百人建武初爲博士受詔校定圖讖當世言詩者推漢
爲長永平中爲千乘太守政有異迹

杜撫

後漢書儒林傳杜撫字叔和犍爲武陽人也少有高才
受業於薛漢定韓詩章句後歸鄉里教授沈靜樂道舉
動必以禮弟子千餘人後爲驃騎將軍東平王蒼所辟
及蒼就國掾吏悉補王官屬未滿歲皆自劾歸時撫爲
大夫不忍去蒼聞賜車馬財物遣之辟太尉府建初中
爲公車令數月卒官其所作詩題約義通學者傳之曰
杜君注云

喬樅謹案華陽國志云杜撫作詩通議說弟子南
陽馮良亦以道學徵聘據此則馮良亦當治韓詩
之學也

澹臺敬伯

韓伯高

後漢書儒林傳薛漢弟子犍爲杜撫會稽澹臺敬伯鉅鹿韓伯高最知名

廉范

後漢書廉范傳范字叔度京兆杜陵人也祖父丹爲大司馬庸部牧父遭喪亂客死於蜀漢范遂流寓西州西州平歸鄉里年十五辭母西迎父喪蜀郡太守張穆丹之故吏廼重資范范無所受與客步負喪歸葭萌載船觸石破沈范抱持棺柩遂俱沉溺衆傷其義鈎求得之

瘡救倖免於死歸葬服竟詣京師受業事博士薛漢後
辟公府會薛漢坐楚王事誅故人門生莫敢視范獨往
收歛之吏曰聞顯宗大怒召范入詰責范叩頭曰臣無
狀愚竊自爲漢等皆已伏誅不勝師資之情罪當萬坐
帝怒稍解因賞之由是顯名舉茂才數月遷爲雲中太
守歷武威都二郡隨俗化導各得治宜建初中遷蜀
郡太守成都民物豐盛邑宇逼側舊制禁民夜作以防
火災而更相隱蔽燒者日屬范迺毀削先令但嚴令儲
水而已百姓爲便迺歌之曰廉叔度來何暮不禁火民
夜作平生無繻今五綳在蜀數年免歸鄉里卒於家

勤

東觀漢記尹勤治韓詩事薛漢身牧豕事親至孝無有
交游門生荆棘

趙煜

後漢書儒林傳趙煜字長君會稽山陰人也少嘗爲縣
吏奉檄迎督郵恥於所役遂棄車馬去到犍爲資中詣
杜撫受韓詩究竟其術積二十年絕問不還家爲發喪
制服煜卒業乃歸舉有道卒於家煜著吳越春秋詩細
感神淵蔡邕亦曾稽讀詩細而歎息以爲長於論衡京
師傳之學者咸誦習焉

喬樅謹案御覽五百五十六引會稽典錄言趙長
君詣杜撫受韓詩撫嘉其精力盡以其道授之至
撫卒長君經營塋之然後歸家可謂篤於師誼矣

張匡

後漢書儒林傳山陽張匡字文通習韓詩作章句後舉
有道博士徵不就卒於家

召馴

後漢書儒林傳召馴字伯春壽春人也少習韓詩博通
書傳以志義聞鄉里號之曰德行恂恂召伯春累仕州
郡辟司徒府建初元年稍遷騎都尉侍講肅宗拜左中

郎將入授諸王帝嘉其義學恩寵甚崇拜陳留太守章
和二年代任隗爲光祿勳卒於官賜冢塋陪園陵孫休
仕至青州刺史

楊仁

後漢書儒林傳楊仁字文義巴郡閬中人也建武中詣
師學習韓詩數年歸所居教授舉孝廉除郎太常上仁
經申博士仁自以年未五十不應舊制上府讓選顯宗
特詔補北宮衛士令引見問當世政迹仁對以寬和任
賢抑黜驕戚爲先上便宜十二事皆當世急務帝嘉之
賜以雜錢肅宗立拜什加令寬惠爲政勸課掾吏子弟

恩信爲衆所附擁兵固守獨安全光武卽位嘉其忠
果召拜郎中再遷太山都尉和集百姓甚得其歡心恭
善爲文著賦頌詩勵學凡二十篇四十九卒官諸儒謚
曰宣明君子牙少習家業者賦頌讚詠凡四十篇舉孝
廉早卒鄉人號曰文德先生

陳豨

東觀漢記陳豨字君期明韓詩時人語曰關東說詩陳
君期

鄭康成

後漢書鄭元傳元字康成北海高密人也少爲鄉閭夫

得休歸嘗詣學官不樂爲吏遂造太學師事京兆第五
元先通京氏易公羊春秋三統厯九章算術又從郡張
恭祖受周官禮記左氏春秋韓詩古文尙書以山東無
足問者乃西入關因涿郡盧植事扶風馬融從質諸疑
義問畢辭歸融喟然謂門人曰鄭生今去吾道東矣元
歸鄉里隱修經業弟子河內趙商等自遠方至者數千
國相孔融深敬於元屢遣門告高密縣爲元特立一
鄉曰鄭公鄉建安元年自徐州還高密道遇黃巾賊數
萬人見元皆拜相約不敢入縣境公車徵爲大司農給
安車一乘所過長吏迎送元廼以病目乞還家卒年七

十四自郡守以下嘗受業者纍經赴會千餘人門生相與撰元荅諸弟子問五經依論語作鄭志八篇凡元所注周易尚書儀禮禮記論語孝經尚書大傳中候乾象厯又著天文七政論魯禮禘祫義六莧論毛詩譜駁許慎五經異義荅臨孝存周禮難凡百餘萬言其門人山陽郝慮至御史大夫東萊王基清河崔炎著名於世又樂安國淵任嘏時並童幼元稱淵爲國器嘏有道德皆如其言

馮緄

後漢書馮緄傳緄字鴻卿巴郡宕渠人也初舉孝廉七

遷爲廣漢屬國都尉徵拜御史中丞順帝末以緄持節督揚州諸郡軍事擊破諸賊遷隴西太守拜京兆尹轉司隸校尉所在立威刑遷廷尉太常延熹五年爲車騎將軍討武陵蠻荊州平定上書乞骸骨後復爲廷尉卒於官

洪适隸釋馮緄碑緄字皇卿少耽學問習父業治韓詩喬樅謹案趙明誠金石錄載車騎將軍馮緄碑緄字皇卿而後漢書馮緄傳作鴻卿與碑不同又本傳有初舉孝廉七遷至廣漢屬國都尉拜御史中丞順帝末持節督揚州軍事與中郎將滕撫擊破

尋賊今據碑自舉孝廉至爲廣漢屬國都尉凡十
一遷而爲中丞與督使徐揚二州討賊皆在爲都
尉前石刻當時所書其名字官爵不應差誤可信
無疑今此傳首尾顛倒錯謬如此然史之所載失
其實者多矣又金石錄謂碑云緄諡爲桓而史亦
不載洪景伯隸釋辨之謂威宗以命將武功定諡
緄亦虎臣之一云云適當其時故作文者以孝桓
帝諡書左方趙氏以爲緄有此諡而史不載誤也
喬樅又攷碑云緄少習父業據後漢書言緄父煥
安帝時爲幽州刺史緄習父業治韓詩則煥亦治

韓詩可知矣

杜喬

後漢書杜喬傳喬字叔榮河內林慮人也少爲諸生舉孝廉辟司徒楊震府稍遷爲南郡太守轉東海相入拜侍中遷大司農時梁冀子弟五人及中常侍等以無功並封喬上書諫書奏不省建和五年代胡廣爲司空正色無所回撓朝野瞻望焉在位數月以震免宦者唐衡左悺等因共譖於帝梁冀遂諷有司劾喬及李固等執繫之獄獄中

司馬彪續漢書喬少好學治韓詩京氏易歐陽尙書以

孝稱雖二千石子常步擔求師

梁商

後漢書梁商傳商字伯夏少以外戚拜郎中遷黃門侍郎永建元年襲父封乘氏侯陽嘉三年以商爲大將軍商以戚屬居大位每存謙柔虛已進賢京師翕然稱爲良輔帝委重焉

東觀漢記商少持韓詩兼讀衆書傳記天姿聰敏昭達萬情舉措動作直推雅性務在誠實不爲華飾孝友著於閭閻明信結於友朋其在朝廷儼恪矜嚴威而不猛退食私館接賓待客寬和肅敬憂人之憂樂人之樂皆

若在已輕貨財不爲之畜積故衣裘裁足卒歲奴婢車馬供用而已朝廷由是敬憚深委任焉

朱勃

後漢書馬援傳朱勃字叔陽年十二能誦詩書馬援爲將軍封侯而勃位不過縣令援常待以舊恩及援遇讒惟勃能終焉

東觀漢記章帝下詔曰告平陵令丞縣人故雲陽令朱勃建武中以伏波將軍爵土不傳上書陳狀不顧罪戾懷旌善之心有國士之風詩云無言不讎無德不報其以縣見穀二千斛賜勃子若孫勿令遠詣闕謝

司馬彪續漢書勅能說韓詩

韋著

後漢書韋彪傳彪次兄豹豹子著字休明少以經行知
名不應州郡之命靈帝卽位就家拜著東海相

謝承後漢書韋著爲三輔冠族少修節操持京氏易韓
詩博通統術

胡碩

蔡邕集陳留太守胡碩碑碩字季獻交趾都尉之孫太
傅安樂侯少子也總角入學治孟氏易歐陽尙書韓氏
詩博綜古文周覽篇籍初除郎中宿衛十年遭叔父憂

車山先生集
以疾自免州郡交辟皆不就舉賢良方正不詣公車建
甯元年召拜議郎納忠盡規匪懈於位遷侍中虎賁中
郎將拜陳留太守卒年四十一

崔炎

三國志魏志崔炎字季珪清河東武城人也年二十三
始感激讀論語韓詩至年二十九乃結公孫方等就鄭
元學大將軍袁紹聞而辟之太祖破袁氏領冀州牧辟
爲別駕從事魏國初建拜尙書遷中尉炎聲姿高暢眉
目疏朗鬚長四尺甚有威重朝士瞻望而太祖亦敬憚
焉

杜瓊

三國志蜀志杜瓊字伯瑜蜀郡成都人也少受業於任安盡得安術後主時仕爲中郎將大鴻臚著韓詩章句十餘萬言不教諸子內學無傳業者

喬縱謹案後漢書儒林傳任安字定祖廣漢緜竹人也少遊太學受孟氏易兼通數經又從同郡楊厚學圖讖究極其術時人稱之曰欲知仲桓問任安又曰居今行古任定祖學終還家教授諸生自遠而至初仕郡後太尉再辟除博士公車徵皆稱疾不就范史稱任安兼通數經杜瓊師事任安盡

得安術據蜀志載杜瓊著韓詩則知任安所習詩
當爲韓氏之學矣

喬樅又案華陽國志云高阮字伯珍少受學於太
常杜瓊藝術微妙博聞強識清尚簡素以明三才
徵爲太史令據此則高玩於詩亦當習韓家也

張紘

三國志吳志張紘字子剛廣陵人步游學京都仕吳爲
會稽都尉子張尙孫皓時爲侍郎○裴松之注引吳書
張紘入太學事博士韓宗治京氏易歐陽尙書又於外
黃從濮陽閎受韓詩及禮記左氏春秋

何隨

常璩華陽國志何隨字季業蜀郡郫人也漢司空武後
世有名德徵聘入官隨治韓詩歐陽尚書研精文緯通
星麻州辟從事光祿郎中主事除安漢令蜀亡去官著
諄言十篇論道德仁義太康中卽家拜江陽太守民思
其政年七十一卒官長子觀字巨忠清公淑慎知名州
里察孝廉西都南安令除巴郡太守次子遊治申從事
祝睦

袁崧後漢書祝睦治韓詩公羊嚴氏春秋

喬樞謹案歐陽文忠集古錄載祝睦碑云君諱睦

字元其下迷缺滅不能成文惟其官壽年月可見
云賓於王廷除北海長史潁川鄆令辟司空府北
軍中候拜大尙書射僕還常山相山陽太守年六
十有八延熹七年卒洪景伯隸釋載歐陽棐集古
錄目云祝睦碑不著書撰人名字睦字元德濟陰
己氏人又隸釋載祝睦後碑云家于濟陰鬣髻入
學修韓詩嚴氏春秋七典竝立兼綜百家與袁崧
後漢書語合

梁景

沈約集梁景少習韓詩爲世通儒漢元嘉元年爲尙書

令

侯包

一作苞

隋書經籍志侯包漢人著韓詩翼要十卷

田君

歐陽修集古錄漢田君碑君東平陽人總角修韓詩京氏易究洞神變窮奧極微爲五官掾功曹州從事辟太尉延熹二年辛亥詔書泰山瑯琊盜賊未息州郡吏有仁惠公清撥煩整化者試守滿歲爲真州言名時牧劉君知君宿操表上試守費縣令

武梁

趙明誠金石錄漢武梁碑梁字綏宗岐嶷有異治韓詩
闕幘侍講兼通河雒諸子傳記州郡請召辭疾不就年
七十四元嘉元年卒

丁魴

洪适隸釋漢丁魴碑魴字叔河耽樂術藝文雅少疇治
易韓詩垂意春秋初爲蜀郡屬國都尉三載功成遷廣
漢屬國都尉

馬江

洪适隸釋漢馬江碑江字元海濟陰乘氏人通韓詩經
以和平元年舉孝廉除郎中謙虛接下冠名三署年四

十九元嘉三年卒

樊安

洪适隸釋樊安碑安字子仲南陽湖陽人也厥祖曰仲山父翼佐周宣出納王命爲之喉舌以致中興食采於樊子孫氏焉君幼以好學治韓詩論語孝經兼通禮傳古今異義宦於王室厯中黃門冗從假史拜小黃門右史遷臧府令中常侍年五十有六以永壽四年卒追拜騎都尉

喬樅謹案續漢書百官志有中黃門冗從僕射而無假史有小黃門而無右史蓋闕文也据此可補

漢志之闕又攷歐陽文忠集古錄載此碑云安字
子佑與隸釋不同未詳孰是

韓詩外傳附錄

侯官陳喬樞學

韓詩外傳七趙簡子有臣曰周舍立於門下三日三夜
簡子使問之曰子欲見寡人何事周舍對曰願爲諤諤
之臣墨筆操牘從君之後司君之過而書之曰有記也
月有成也歲有效也簡子居則與居出則與之出居無
幾何而周舍死簡子如喪子後與諸大夫飲於淇波之
臺酒酣簡子涕泣諸大夫皆出走曰臣有罪而不自知
也簡子曰大夫皆無罪昔者吾友周舍有言曰千羊之
皮不若一狐之腋衆人之諾諾不若一士之諤諤昔者

商紂然然而亡武王諤諤而昌今自周舍之死吾未嘗
聞吾過也吾亡無日矣是以寡人泣也

喬樅謹案從君之後司君之過而書之舊本無之
後司君書之六字太平御覽六百三引有之新序
雜事一載此節文亦與御覽同趙懷玉校本據以
補入又廣韻五質引韓詩外傳作從君之後伺君
過而書之君下無之字

又曰子貢問大臣子曰齊有鮑叔鄭有子皮子貢曰否
齊有管仲鄭有東里子產孔子曰產薦也子貢曰然則
薦賢賢於賢曰知賢智也推賢仁也引賢義也有此三

者又何加焉

喬樅謹案說苑臣道篇亦載此條而文不同趙懷
玉校本云產薦也文有脫誤當云管仲鮑叔薦也
子產子皮薦也方合

韓詩外傳八越王勾踐使廉稽獻民於荆王荆王使者
曰越夷狄之國也臣請欺其使者荆王曰越王賢人也
其使者亦賢子其慎之使者出見廉稽曰冠則得以俗
見不冠不得見廉稽曰夫越亦周室之列封也不得處
於大國而處江海之陂與魴鱸魚鼈爲伍文身剪髮而
後處焉今來至上國必曰冠得俗見不冠不得見如此

則上國使適越亦將劓墨文身翦髮而後得以俗見可
乎荆王聞之披衣出謝孔子曰使於四方不辱君命可
謂士矣

又曰齊景公使人於楚楚王與之上九重之臺顧使者
曰齊有臺若此乎使者曰吾君有治位之坐土階三等
茅茨不翦樸椽不斲者猶以謂爲之者勞居之者泰吾
君惡有臺若此者於是楚王蓋愜如也使者可謂不辱
君命其能專對矣

又曰古者天子爲諸侯受封謂之采地百里諸侯以三
十里七十里諸侯以二十里五十里諸侯以十里其後

子孫雖有罪而紂使子孫賢者守其地世世以嗣其始受封之君此之謂興滅國繼絕世也書曰茲予享于先王爾祖其從享之

韓詩外傳九伯牙重琴鍾子期聽之方鼓琴志在山鍾子期曰善哉鼓琴巍巍乎如太山志在流水鍾子期曰善哉鼓琴洋洋乎若江河鍾子期死伯牙擗琴絕絃終身不復鼓琴以爲世無足與鼓琴也非獨琴如此賢者亦有之苟非其時則賢者將奚由得遂其功哉

又曰孔子出遊少原之野有婦人中澤而哭其音甚哀孔子怪之使弟子問焉曰夫人何哭之哀婦人曰鄉者

刈著薪亡吾著簪吾是以哀也弟子曰刈著薪而亡著簪有何悲焉婦人曰非傷忘簪也蓋不忘故也

喬樅謹案怪之二字舊本脫去趙懷玉校本據文選陸士衡連珠李善注引補太平御覽五十五引亦同又蓋不忘故也二書所引並作吾所以悲者不忘故也

又曰孔子與子貢子路顏淵游於戎山之上孔子喟然嘆曰二三子各言爾志予將覽焉由爾何如對曰得白羽如月赤羽如日擊鐘鼓者上聞於天下槩於地使將而攻之惟由爲能孔子曰勇士哉賜爾何如對曰得素

衣赭冠使於兩國之間不持尺寸之兵升斗之糧使兩國相親如弟兄孔子曰辯士哉回爾何如對曰鮑魚不與蘭茝同筭而藏桀紂不與堯舜同時而治二子已言回何言哉孔子曰回有鄙之心顏淵曰願得明王聖主爲之相使城郭不治溝池不鑿陰陽和調家給人足鑄庫兵以爲農器孔子曰大士哉由來區區汝何攻賜來便便汝何使願得之冠爲子宰焉

喬樅謹案此與第七卷孔子遊於景山篇語意略相似趙懷玉校本云回有鄙之心句似有脫字願得之冠句疑亦有譌字

又曰孔子出衛之東門逆姑布子卿曰二三子引車避
有人將來必相我者也志之姑布子卿亦曰二三子引
車避有聖人將來孔子下步姑布子卿迎而視之五十
步從而望之五十步顧子貢曰是何爲者也子貢曰賜
之師也所謂魯孔丘也姑布子卿曰是魯孔丘歟吾固
聞之子貢曰賜之師何如姑布子卿曰得堯之顓孫之
目禹之頸皋陶之喙從前視之盎盎乎似有王者從後
視之高且弱脊此惟不及四聖者也子貢吁然姑布子
卿曰子何患焉汙面而不惡蔑喙而不藉遠而望之羸
乎若喪家之狗子何患焉子貢以告孔子孔

子無所辭獨許喪家之狗耳曰臣何敢乎子貢曰汙面而不惡葭喙而不藉賜以知之矣不知喪家狗何足辭也子曰賜汝獨不見夫喪家之狗歟既飲而桴布器而祭顧望無人意欲施之上無明王下無賢士方伯王道衰政教失強陵弱衆暴寡百姓縱心莫之綱紀是人固以臣爲欲當之者也臣何敢乎

又曰田子方之魏魏太子從車百乘而迎之郊太子再拜謁田子方田子方不下車太子不說曰敢問何如則可以驕人矣田子方曰吾聞以天下驕人而亡者有矣以一國驕人而亡者有矣由此觀之則貧賤可以驕人

車言義訓
矣夫志不得則揆履而適秦楚耳安往而不得貧賤乎
於是太子再拜而後退田子方遂不下車

喬樅謹案以一國驕人句各本皆脫佚依太平御
覽七百七十三引增入

又曰戴晉生敝衣冠而往見梁王梁王曰前日寡人以
上大夫之祿要先生先生不留今過寡人邪戴晉生欣
然而笑仰而承嘆曰嗟呼由此觀之君曾不足與遊也
君不見夫澤中雉乎五步一喝終日乃飽羽毛悅澤光
照於日月奮翼爭鳴聲響於陵澤者何彼樂其志也援
置之囷倉中常噉梁粟不旦時而飽然猶羽毛憔悴志

氣益下。頭不鳴。夫食豈不善哉。彼不得其志故也。今臣不遠千里而從君遊者。豈食不足。竊慕君之遊耳。臣始以君爲好士。天下無雙。乃今見君不好士。明矣。辭而去。終不復往。

又曰。傳曰。昔戎將山余。使秦繆公問以得失之要。對曰。古有國者。未嘗不以恭儉也。失國者。未嘗不以驕奢也。由余論五帝三王之所以衰及至布衣之所以亡繆公。然之於是。告內史王繆曰。隣國有聖人。敵國之憂也。由余聖人也。將奈之何。王繆曰。夫戎王居僻陋之地。未嘗見中國之聲色也。君其遺之女。樂以姪其志。亂其政。

其臣下必疎因爲由余請緩期使其君臣有間然後可
圖繆公曰善乃使王繆以女樂二列遺戎王爲由余請
期戎王大悅許之於是張酒聽樂日夜不休終歲姪縱
卒馬多死由余歸數諫不聽去之秦秦公子迎拜之上
卿遂并國十二辟地千里

喬樅謹案由余漢書古今人表作繇余師古曰繇
由余攷由姓見於廣韻余其名也王繆當作王廖
古今人表王廣列中上第四等師古曰廖音聊文
選四子講德論李善注引韓詩外傳正作王廖宜
据以改正韓子十過篇呂氏春秋不苟篇史記秦

本紀並作內史廖說苑尊賢篇作王子廖

又曰晏子之妻使人布衣紵表田無宇譏之曰出於室何爲者也晏子曰家臣也田無宇曰位爲中卿食田七十萬何用是人爲畜之晏子曰棄老取少謂之瞽貴而忘賤謂之亂見色而說謂之逆吾豈以逆亂瞽之道哉又曰齊王厚送女欲妻屠牛吐屠牛吐辭以疾其友曰子終死腥臭之肆而已乎何爲辭之吐應之曰其女醜其友曰子何以知之吐曰以吾屠知之其友曰何謂也吐曰吾肉善如量而去苦少耳吾肉不善雖以吾附益之尙猶賈不售今厚送子子醜故耳其友後見之果醜

目如擗杏齒如編貝

喬樅謹案苦少舊譌作若少又如量二字各本脫去據初學記十九及太平御覽三百八十二引俱作如量而去苦少耳趙懷玉校本依兩書引增改又以吾初學記引作以他又目如擗杏上各本有傳曰二字疑衍文也

又曰傳曰孔子過康子子張子夏從孔子入坐二子相與論終日不決子夏辭氣甚隘顏色甚變子張曰子亦聞夫子之議論邪徐言闇闇威儀翼翼後言先默得之推讓巍巍乎蕩蕩乎道有歸矣小人之論也專意自是

言人之非順目搯腕疾言噴噴口沸目赤一幸得勝疾
笑嗔嗔威儀固陋辭氣鄙俗是以君子賤之也

喬樞譚案噴噴趙懷玉校語云疑是噴噴之譌

韓詩外傳十齊景公遊於牛山之上而北望齊曰美哉
國乎鬱鬱泰山使古而無死者則寡人將去此而何之
俯而泣沾襟國子高子曰然臣賴君之賜疏食惡肉可
得而食也驚馬柴車可得而乘也且猶不欲死而况君
乎又俯而泣晏子曰樂哉今日嬰之遊也見怯君一而
諛臣二使古而無死者則太公丁公至今猶存吾君方
今將被蓑笠而立乎畎畝之中惟農事之恤何暇念死

乎景公慙而舉觴自罰因罰二臣

喬樞謹案而况君乎又俯而泣舊本無兩而字又
字據太平御覽百六十引有之又太公下舊脫丁
公二字惟農事之恤句舊脫農字並依御覽補之
又曰秦繆公將田而喪其馬求三日而得之於莖山之
陽有鄙夫乃相與食之繆公曰此駿馬之肉不得酒者
死繆公乃求酒徧飲之然後去明年晉師與繆公戰晉
之左格右者圍繆公而擊之甲已墮者六矣食馬者三
百餘人皆曰吾君仁而愛人不可不死還擊晉之左格
右免繆公之死

又曰吳延陵季子遊於齊見遺金呼牧者取之牧者曰
子居之高視之下貌之君子而言之野也吾有君不君
友不友當暑衣裘君疑取金者乎延陵子知其爲賢者
請問姓字牧者曰子乃皮相之士也何足語姓字哉遂
去延陵季子立而望之不見乃止孔子曰非禮勿視非
禮勿聽

又曰顏淵問於孔子曰淵願貧如富賤如貴無勇而威
與士交通終身無患難亦且可乎孔子曰善哉回也夫
貧而如富其知足而無欲也賤而如貴其讓而有禮也
無勇而威其恭敬而不失於人也終身無患難其擇言

而出之也若回者其至乎雖上古聖人亦如此而已

又曰齊景公出田十有七日而不反晏子乘而往比至衣冠不正景公見而怪之曰夫子何遽乎得無有急乎晏子對曰然有急國人皆以君爲惡民好禽臣聞之魚鼈厭深淵而就乾淺故得於釣網禽獸厭深山而下於都澤故得於田獵今君出田十有七日而不反不亦過乎景公曰不然爲賓客莫應待邪則行人子牛在爲宗廟而不血食邪則祝人太宰在爲獄不中邪則大理子幾在爲國家有餘不足邪則巫賢在寡人有四子猶有四肢也而得代焉可不患焉晏子曰然人心有四肢而

得代焉則善矣今四肢無心十有七日不死乎景公曰
善哉言遂援晏子之手與驂乘而歸若晏子者可謂善
諫者矣

又曰楚莊王將興師伐晉告士大夫曰敢諫者死無赦
孫叔敖曰臣聞畏鞭箠之嚴而不敢諫其父非孝子也
懼斧鉞之誅而不敢諫其君非忠臣也於是遂進諫曰
臣聞中有榆其上有蟬蟬方奮翼悲鳴欲飲清露不知
螳螂之在後曲其頸欲攫而食之也螳螂方欲食蟬而
不知黃雀在後舉其頸欲啄而食之也黃雀方欲食螳
螂不知童子挾彈丸在下迎而欲彈之童子方欲彈黃

崔不知前有深坑後有窟也此皆言前之利而不顧後
害者也非獨昆蟲獸庶若此也人主亦然君今知貪彼
之士而樂其士卒國不怠而楚國以甯孫叔敖之力也
喬樅謹案挾彈丸在下北堂書鈔百三十四引作
挾彈在榆下後有窟也書鈔引作後有掘株也又
樂其士卒下疑有脫文

韓詩內外傳補逸

侯官陳喬樞學

韓詩外傳曰天見其象地見其形聖人則之

文選卷二十一應吉甫

晉武帝華林園集詩注

韓詩外傳曰惟天命本人情人有五藏六府何謂五藏情藏於腎神藏於心魂藏於肝魄藏於肺志藏於脾何謂六府咽喉入量之府胃者五穀之府大腸轉輸之府小腸受成之府膽積精之府膀胱液之府也

太平御覽三百六十

韓詩外傳曰人死曰鬼鬼者歸也精氣歸於天肉歸於

土血歸於水筋歸於山齒歸於石膏歸於露髮歸於草

呼吸之氣復歸於人

太平御覽八百八十三

韓詩外傳曰五帝官天下三王家天下家以傳子官以

傳賢故自唐虞以上經傳無太子稱號夏殷之王雖則

傳嗣其文略矣至周始見文王世子之制

太平御覽一百五十九

韓詩外傳曰白骨類象魚目似珠

文選卷四十任昉到大司馬記室牋注

韓詩外傳曰代馬依北風飛鳥棲故巢皆不忘本之謂

也

文選卷二十九古詩十九首注

喬樅謹案代馬依北風句又見文選卷三十六宣

德皇后令注引外傳

韓詩外傳曰文王使南宮括至義渠得駭雞犀以獻紂

太平御覽
八百九十

韓詩外傳曰魯哀公使人穿井三月不得泉得一玉羊
焉公以爲祥使祝鼓舞之欲上於天羊不能上孔子見
公曰水之精爲玉土之精爲羊願無怪之此羊肝土也
公使殺之視肝卽土矣太平御覽
九百二

韓詩外傳曰孔子曰水之精爲玉老蒲爲韋願無怪之

文選卷五十九沈約齊
故安陸昭王碑文注

韓詩外傳曰禽息秦人知百里奚之賢薦之於繆公爲
私而加刑焉公後知百里之賢乃召禽息謝之禽息對

曰臣聞忠臣進賢不私顯烈士憂國不喪志奚陷刑臣

之罪也乃對使者以首觸楹死以上卿之禮葬之

文選卷五

十五陸機演連珠注

韓詩外傳曰禽息秦大夫薦百里奚不見納繆公出當

車以頭擊闕牆乃精出曰臣生無補於國不如死也繆

公感寤而用百里奚秦以大化

後漢書朱暉傳注

韓詩外傳曰楚昭王亡其跣履已行三十步而還之左

右曰何惜此王曰吾悲與之俱出不俱反自是楚國無

相棄者

文選卷四謝朓拜中軍記室辭隋王牋注

韓詩外傳曰楚襄王遣使者持金千斤白璧百雙聘莊

子欲以爲相莊子曰獨不見太廟之牲乎衣以帛繡食以芻豢出則清道而行止則居帳之內此豈不貴乎乃其不免於死宰執旌居前或持在後當此之時雖欲爲孤犢從雞鼠遊豈可得乎僕聞之左手據天下之圖右手刎其頸愚者不爲也

太平御覽四
百七十四

韓詩外傳曰崔杼殺莊公陳不占東觀漁者聞君難將往死之淪則失哺上車失軾僕曰敵在數百里外今食則失哺上車失軾雖往其有益乎陳不占曰死君義也無勇私也遂驅車比至門聞鼓鐘之音戰鬪之聲遂駭而死君子聞之曰陳不占可謂志士矣無勇而能行義

天下鮮矣

太平御覽四
百九十九

韓詩外傳曰趙簡子太子名伯魯小子名無恤簡子自
爲二書牘親自表之書曰節用聽聰敬賢勿慢使能勿
賤與二子使誦之居三年簡子坐清臺之上問二書所
在伯魯忘其表令誦不能得無恤出其書於袖令誦習
焉乃出伯魯而立無恤

太平御覽一
百五十九

韓詩外傳曰魯有男子獨處夜暴風雨至婦人趨而託
之男子閉戶不納曰吾聞男女不六十不閒居婦人曰
子何不學柳下惠然嫗不逮門之女國人不稱其亂焉

後漢書崔
駰傳注

韓詩外傳曰婦人有五不娶喪婦之長女不娶爲其不
受命也世有惡疾不娶弃於天也世有刑人不娶弃於
人也亂家女不娶類不止也逆家子不娶廢人倫也後漢

書應奉傳注

韓詩外傳曰孔子使子貢適齊久而未回孔子占之遇
鼎謂弟子曰占之遇鼎無足而不來顏回掩口而笑孔
子曰回也何哂曰回謂賜必來孔子曰如何對曰卜而
鼎無足必乘舟而來矣賜果至北堂書鈔

韓詩外傳曰孔子顏淵登魯泰山望吳昌門淵曰見一
匹練前有生藍子曰白馬蘆芻也太平御覽

八百十八

韓詩外傳曰曾參喪妻不更娶人問其故曾子曰以華

元善人也

漢書王吉傳注

韓詩外傳曰無為虎傅翼將飛入邑擇人而食夫置不

肖之人於位是為虎傅翼也

後漢書翟

韓詩外傳曰公道達而私門塞

文選卷三十七庾亮讓中書令表注

韓詩外傳曰強不陵弱眾不暴寡

文選卷五十七潘岳馬汧督誄注

韓詩傳曰皮弁以征

成二年公羊傳疏

韓詩曰衛靈公至濮水夜分而聞有鼓琴者

文選卷十六潘岳寡

如賦

韓詩曰說之以名

文選卷二十一應璩百一詩注

韓詩曰利爲害本福爲禍先

文選卷二十五盧
諶答劉琨詩注

韓詩曰子產卒鄭人耕者輟耒婦人捐其佩玦也

史記
循吏

傳索
隱

韓詩曰齊人青將討公孫無知辭其友其友曰耕田艾

艸農之力也討君之賊大夫職也

太平御覽八
百二十二

喬樅謹案御覽於此條上先引韓詩曰三之日于

耜云云而以又曰類引此節則此亦韓詩內傳文

也

韓詩遺說攷目錄

國風卷第一

周南召南 一之一

邶風 一之二

鄘風衛風 一之三

國風卷第二

王風鄭風 二之一

齊風 至秦風 二之二

陳風 至豳風 二之三

小雅卷第三

鹿鳴

至吉日 三之一

鴻雁

至巷伯 三之一

谷風

至賓之初筵 三之三

魚藻

至何草不黃 三之四

大雅卷第四

文王

至文王有聲 四之一

生民

至板 四之二

蕩

至雲漢 四之三

崧高

至召閔 四之四

頌卷第五

周頌清廟

至泂五之一

雝

至般五之二

魯頌

五之三

商頌

五之四

外傳附錄

內外傳補逸

韓詩遺說攷卷第一

一之二

福州陳詩祺學

男喬樅述

韓詩國風一

案春秋序正義曰韓嬰之爲詩經傳異處攷漢書
藝文志載詩經二十八卷魯齊韓三家又韓故三
十六卷韓內傳四卷韓外傳六卷韓說四十一卷
是其經傳異處也

周南召南

韓嬰敘詩云其地在南郡南陽之間

水經注
三十四

喬樅謹案唐詩藝文志韓嬰詩序二卷卽水經

注所引也楚地記漢江之北爲南陽漢江之南爲南郡胡徵士虔曰案漢南郡今湖北荊州府荊門州及襄陽施南宜昌三府之境南陽今河南南陽府汝州之境周南之詩曰汝墳者其東北境至汝也曰漢廣江永者其西至漢南至江也召南之詩曰江沱者其西北至蜀東南至南郡也大約周南有南郡之東而東至南陽召南有南郡之西而西至巴蜀也

周南關雎

韓詩外傳五子夏問曰關雎何以爲國風始也孔子

曰關雎至矣乎夫關雎之人仰則天俯則地幽幽冥冥德之所藏紛紛沸沸道之所行如神龍變化斐斐文章大哉關雎之道也萬物之所繫羣生之所懸命也河洛出圖書麟鳳翔乎郊不由關雎之道則關雎之事將奚由至矣哉夫六經之策皆歸論汲汲益取之乎關雎關雎之事大矣哉馮翊翊自東自西自南自北無思不服子其勉強之思服之天地之間生民之屬王道之原不外乎此矣子夏喟然歎曰大哉關雎乃天地之基也詩曰鼓鐘樂之

關關雎鳩在河之洲窈窕淑女君子好求

韓詩章句曰詩人言雉鳩貞潔慎匹以聲相求必於

河之洲隱蔽無人之處故人君退朝入於私宮后妃

御見去留有度後漢書馮衍傳注引薛夫子韓詩章句應門擊柝鼓人

上堂退反晏處體安志明今時大人內傾於色賢人

見其萌故詠關雎說淑女正容儀以刺時後漢書明帝紀注引

薛君韓詩章句○又馮衍傳注引薛夫子韓詩章句人君下有動靜二字有度下無應門擊柝四句

喬樅謹案後漢書儒林傳云薛漢字公子淮陽

人世習韓詩父子以章句著名陸璣草木疏云

漢傳父業尤善說災異受詔定圖讖當時言詩

推爲長唐書宰相世系表薛夫子名方回薛廣

德會孫漢之父也

薛君章句曰竊窺貞專貌

文選二十一顏延年秋胡詩注

韓詩曰淑女奉順坤德成其紀綱

文選五十八顏延年宋元皇后哀策

文注

補後漢書明帝紀應門失守關雎刺世

喬樅謹案春秋說題辭云人主不正應門失守故歌關雎以感之宋均注云應門聽政之處也言不以政事爲務則有宜淫之心關雎樂而不淫思得賢人與之共化修應門之政者也據漢書藝文志言齊轅固燕韓生皆爲詩傳或取春

秋采雜說然則韓詩詠關雎以刺時之說卽本之春秋緯也

補後漢書馮衍顯志賦美關雎之識微兮愍王道之將崩

喬樞謹案後漢書本傳云衍年九歲能誦詩至二十而博通經書衍子豹亦好儒學自詩春秋教授麗山下范書雖不言衍習何詩然據衍自論有伐冰之家不利鷄豚之息委積之臣不操市井之利云云語出韓詩外傳則知敬通所習爲韓詩也

補後漢書應奉上書曰母后之重興廢所因宜思闕
雖之所求遠五禁之忌

本傳

喬樅謹案五禁所忌章懷注引韓詩外傳婦人
有五不娶語爲證應奉卽用韓義又案文選西
都賦六臣注引詩云君子好求唐惟韓詩尙存
是韓詩字不作述仇與魯齊毛竝異也

輾轉反側

補李賢後漢書注詩國風曰輾轉反側反側不安也
光武紀

喬樅謹案章懷太子注引詩國風不言其爲何

東詩然其說與毛詩鄭箋異知用韓義也

左右覲之

補玉篇見部詩曰左右覲之覲擇也

喬樅謹案玉篇又云覲本亦作𦣻覲字从見者謂視而擇之也覲爲今文正字玉篇引詩是據韓家之文作𦣻者毛氏古文以𦣻爲覲之假借也顧野王玉篇撰於梁大同九年是時齊魯詩已亡惟韓詩存故玉篇所載詩經文字訓義兼採韓毛二家如人部仲字下引詩曰仲氏任只仲中也六部𦣻字下云夜也詩曰中𦣻之言中

夜之言也本亦作蕘雖皆不言其爲韓詩然據
釋元應衆經音義九引韓詩曰仲中也言位在
中也陸德明經典釋文牆有茨篇引韓詩云中
蒿中夜謂淫僻之言也竝與玉篇訓同則玉篇
所引之爲韓詩訓義無疑矣又如女部嫵字下
引詩曰嫵婉之求門部閼字下引詩曰高門有
閼亦不言其爲韓詩然據李善文選注二引韓
詩曰嫵婉之求嫵婉好貌經典釋文綿篇引韓
詩曰閼盛貌皆與玉篇文同則玉篇所引之爲
韓詩異文又無疑矣今於玉篇引詩有異義者

必參觀而互證之凡說文所載三家異文而玉篇據以採入者概置弗錄蓋闕疑之義云爾

鐘鼓樂之

韓詩外傳二古者天子左五鐘將出則撞黃鐘而右五鐘皆應之馬鳴中律駕者有文御者有數立則磬折拱則抱鼓行步中規折旋中矩然後大師奏升車之樂告出也入則撞蕤賓以治容貌容貌得則顏色齊顏色齊則肌膚安蕤賓有聲鶴震馬鳴及僕介之蟲無不延頸以聽在內者皆玉色在外者皆金聲然後少師奏升堂之樂卽席告人也此言音樂相和物

類相感同聲相應之義也詩曰鐘鼓樂之此之謂也
案外傳言天子左五鐘右五鐘云云與尙書大傳
說合

喬樅謹案鐘鼓樂之惟外傳五引詩作鼓鐘而
此仍作鐘鼓今攷外傳言天子左五鐘右五鐘
而不兼言鼓侯包言后妃房中之樂亦但云有
鐘磬而不及鼓疑韓詩之義訓鼓爲擊不與毛
同此所引詩當作鼓鐘爲是或據薛君章句有
應門擊柝鼓人上堂語以爲當兼備鐘鼓其義
亦通

侯包韓詩翼要曰后妃房中樂有鐘磬

隋書樂志○杜佑通典百

四十七
引同

喬樅謹案隋書經籍志云侯包漢人著韓詩翼
要十卷包一作苞攷北史房暉遠傳隋文帝問
房暉遠曰自古天子有女樂乎對曰臣聞窈窕
淑女鐘鼓樂之此卽王者房中之樂暉遠之對
蓋本韓詩也

葛覃

惟葉萋萋

薛君韓詩章句曰惟辭也

文選八楊雄羽獵賦注○又二十三阮籍詠懷詩注

裴盛也

文選七潘岳
籍田賦江

喬樞謹案後漢書儒林傳云張匡字文通習韓
詩作章句三國蜀志又云杜瓊字伯瑜成都人
後主時爲中郎將大鴻臚著韓詩章句十餘萬
言今攷隋書經籍志止載韓詩二十二卷漢常
山太傅嬰薛氏章句是張杜二家章句已罕傳
本故不收藏然則陸德明釋文李善文選注各
書所引單稱韓詩章句或單稱韓詩皆薛氏章
句也盧文弼曰案毛詩維字韓詩當作惟故云
惟辭也

是刈是穫

雖詩曰刈取也穫淪也

陸德明毛詩釋文

喬樅謹案刈毛詩作艾釋文云艾本亦作刈穫
毛傳云煮之也爾雅釋訓是刈是穫穫煮之也
舍人注曰是刈刈取之是穫煮治之皆與韓詩
合是韓韓毛義並同李黼平曰說文穫云雨流
而下則穫爲浸漬淋離之貌與淪字意同蓋謂
浸漬而煮之也

卷耳

不盈傾筐

韓詩曰傾筐欹器也

毛詩釋文

喬樞謹案毛傳云傾筐舂屬易盈之器也攷說文匚部匡飯器筥也重文筐云匡或從竹又竹部筥箝也箝下云一曰飯器容五升一曰宋魏謂箝箝爲箝箝下云飯箝也段氏注曰危部箝匱也箝者頃側之意箝必頃側用之故曰飯箝宗廟有坐之欹器古亦當作箝器也然則詩之頃筐謂筐之半淺半深者蓋卽箝之類其爲製不平故云箝器其受物甚少故云易盈也

我姑酌彼金罍

許慎五經異義六器制韓詩說金罍大器也天子以玉諸侯大夫皆以金士以梓

案毛詩音義引韓詩云天子以玉飾諸侯大夫皆以黃金飾士以梓毛詩正義引韓詩說士以梓士無飾據此則異義所引稍畧

韓詩說曰金罍大夫器也

喬樞謹案詩正義引作大夫器也周禮司尊彝疏引此云金罍大器無夫字盧文弨曰夫字乃衍文周禮疏所引是也喬樞謂據五經異義言諸侯大夫皆以金則金罍亦可云大夫器也

陟彼高岡

補衆經音義廿五詩云陟彼高岡陟登也

喬樅謹案此所引詩是據韓詩之說毛傳訓陟爲升升亦登也元應衆經音義兼採毛韓二家有明著爲韓詩者如韓詩云曲京曰阿韓詩傳曰南北曰縱東西曰橫是也有明著爲毛詩者如毛詩日出言有章毛詩傳曰憂心惓惓是也明有不著其爲韓爲毛者以毛傳鄭箋立於國學世所遵用韓詩亦經注尙存可攷而知故文從畧耳今攷音義卷十九逶迤下云迤又作佗

同詩云逶逶佗佗德之美貌也不言其爲韓詩
然據卷三委佗下引韓詩委佗德之美貌也可
證十九卷所引亦皆爲韓詩說卷十二陶演下
引詩云憂心且陶陶暢也亦不言其爲韓詩然
據後漢書注八十上李善文選注三十四竝引
作韓詩則衆經音義所引之爲韓詩又可互證
也

我馬元黃

補曹植贈白馬王彪詩我馬元以黃

喬樞謹案陳思王用韓詩說見王風黍離篇

我姑酌彼兕觥

韓詩說曰一升曰爵爵盡也足也二升曰觚觚寡也
飲當寡少也三升曰解解適也飲當自適也四升曰
角角觸也不能自適觸罪過也五升曰散散訕也飲
酒不自節爲人謗訕也總名曰爵其實曰觴觴者酌
也觥亦五升所以罰不敬也觥廓也所以著明之貌
君子有過廓然著明非所以餉不得名觴毛詩正義
又禮記左

傳正義
引並同

案韓詩說一升曰爵云云儀禮士昏疏引作內傳
喬樅謹案周禮梓人疏引韓詩說一升曰爵至

五升曰散文同惟廣川書跋引韓詩作四升曰散四字是五之誤宋綿初云古人訓詁多取音同音近此注爵盡角觸聲相近觥寡觴適散訕觴餉聲相同故取訓如此也觥從光得聲廓从郭得聲光郭一聲之轉說文光明也觥从光聲亦卽此義方言云張小使大謂之廓張大卽著明之義數者散言之則通對言之則異也

云何吁矣

薛君章句曰云辭也

文選二十五傳咸詩注

南有枌木

陸德明毛詩釋文枹木韓詩本作枹

喬樅謹案釋文云馬融本並作枹又引說文以枹爲木高也攷說文又有枹字云下句曰枹與毛傳木下曲曰枹訓合然據爾雅釋木云下句曰枹則枹枹音義並同古得通用也

蝨斯

補續漢書順烈梁皇后曰陽以博施爲德陰以不專爲義蓋詩人蝨斯之禍則百斯男之祚所由興也

太平

御覽一百

三十七

喬樅謹案續漢書及後漢書皇后紀並言后治

韓詩能舉大義此所稱孟斯詩卽韓說也

宜爾子孫繩繩兮

韓詩外傳九孟子少時誦其母方織孟子輟然中止乃復進其母知其誼也呼而問之曰何爲中止對曰有所失復得其母引刀裂其織以此誡之自是之後孟子不復誼矣孟子少時東家殺豚孟子問其母曰東家殺豚何爲母曰欲啖汝其母自悔而言曰吾懷妊是子席不正不坐割不正不食胎教之也今適有知而欺之是教之不信也乃買東家豚肉以食之明不欺也詩云宜爾子孫繩繩兮言賢母使子賢也

又曰田子爲相三年歸休得金百飴奉其母母曰子
安得此金對曰所受俸祿也母曰爲相三年不食乎
治官如此非吾所欲也孝子之事親也盡力致誠不
義之物不入於館爲人臣不忠是爲人子不孝也子
其去之田子慚愧走出造朝還金退請就獄王賢其
母說其義卽舍田子罪令復爲相以金賜其母詩曰
宜爾子孫繩繩兮言賢母使子賢也

喬樅謹案舊本無爲人臣不忠是六字又不孝
上衍不可二字趙懷玉校本據太平御覽卷八
百十一引增刪

免罟

肅肅免罟

補劉良文選注曰罟免網也殷紂之賢人退處山林

網禽獸而食之

文選三十七桓溫薦
譙元彥表六臣注

喬樅謹案劉良此說蓋亦本於韓詩攷墨子尙
賢篇云文王舉閔天泰顛於罟網之中授之政
西土服陳氏啟源毛詩稽古篇謂墨子之言必
當時說詩者有得賢於免罟之解故舉閔天泰
顛以實之今案閔天泰顛事正當文王與紂之
時其說殆卽韓詩所本歟

施于中尫

韓詩曰肅肅免且施于中尫○薛君曰中尫尫中九

交之道也

文選十一鮑照蕪城賦注○又二十顏延年釋奠詩注○又二十七王粲從軍詩注

喬樅謹案說文尫九達道也似龜背故謂之尫

从九首或作達王氏念孫曰尫從九首聲故與

好仇韻也毛詩作達達在尤韻字從壘得聲讀

如逐今韻尫達並入脂爲渠追切作叶音者以

好仇之仇爲渠之切以韻達字讀韓詩自知其

誤

芣苢

韓詩曰芣苢傷夫有惡疾也

文選五十四劉峻辨命論注○又太平御覽七

百四

十二

喬樅謹案此所引蓋韓詩序太平御覽引作韓

詩外傳誤也

采采芣苢薄言采之

韓詩曰采采芣苢薄言采之○薛君曰芣苢澤瀉也

芣苢臭惡之草詩人傷其君子有惡疾人道不通求

已不得發憤而作以是興芣苢雖臭惡乎我猶采采

而不已者以興君子雖有惡疾我猶守而不離去也

文選辨

命論注

喬樞謹案御覽七百四十二引韓詩曰芣苢臭
惡之菜字不作草

韓詩曰直曰車前瞿曰芣苢

毛詩
釋文

案大觀本草六引陶隱居云韓詩乃言芣苢是木
似李食其實宜子孫此爲謬矣此陶隱居引韓詩
而駁之也然與毛詩釋文及文選注所引不合豈
隱居誤記耶釋文又云山海經及周書王會皆云
芣苢木也實似李食之宜子出於西戎衛氏傳及
許慎並同王肅亦同王基已有駁難也攷王會解
作桴苢恐與詩之芣苢爲二物衛氏傳當是衛宏

所作而釋文序錄不言後漢書所謂宏作訓旨殆
卽是也衛許皆習古文詩皆宗毛不知何以解芎
芎誤草爲木

補劉峻辨命論曰冉耕歌其芎芎
漢廣

韓詩序曰漢廣悅人也

文選三十四
曹植七啟注

南有喬木不可休思漢有游女不可求思

韓詩內傳曰鄭交甫遵彼漢皋臺下遇二女與言曰

願請子之珮二女與交甫交甫受而懷之超然而去

十步循探之卽亡矣迴顧二女亦卽亡矣

文選十一郭
璞江賦注

韓詩外傳曰鄭交甫將南適楚道彼漢皋臺下乃遇

二女佩兩珠大如荆雞之卵

文選四張衡南都賦注又三十五張協七命注

喬樅謹案文選卷廿三阮籍咏懷詩曰二妃遊

江濱逍遙順風翔交甫懷環珮婉孌有芬芳李

善注引列仙傳曰江妃二女出遊江濱交甫遇

之餘與韓詩內傳同已見南都賦可證此引外

傳外字乃內之譌又太平御覽八百二引韓詩

內傳曰漢女所弄珠如荆雞卵與南都賦注所

引語合亦皆作內傳不誤也

許氏說文鬼部魃鬼服也韓詩傳云鄭交甫遇二女

魅服

案初學記引韓詩曰遇二女妖服珮兩珠卽此

韓詩曰漢有游女不可求思○薛君章句曰游女謂

漢水之神也言漢神時見不可得而求之後漢書注

文選卷十八稽康琴賦注○又卷三十四曹植七啟注○又卷五十八謝朓齊敬皇后哀策文注

補曹植七啟諷漢廣之所咏覲游女于水濱

補曹植洛神賦嗟佳人之信修兮羌習禮而明詩○

感交甫之棄言兮悵猶豫而狐疑

喬縱謹案陳思王用韓詩何焯亦以子建洛神

賦之義爲本薛君章句也

韓詩外傳二孔子南遊適楚至於阿谷之隧有處子
佩璫而浣者孔子曰彼婦人其可與言矣乎抽觴以
授子貢曰善爲之辭以觀其語子貢曰吾北鄙之人
也將南之楚逢天之暑思心譚譚顏乞一飲以表我
心婦人對曰阿谷之隧隱曲之汜其水載清載濁流
而趨海欲飲則飲何問婦人乎受子貢觴迎流而挹
之矣然而棄之從流而挹之矣然而溢之坐置之沙
上曰禮固不親授子貢以告孔子曰某知之矣抽琴
去其軫以授子貢曰善爲之辭以觀其語子貢曰嚮
子之言穆如清風不悖我語和暢我心於此有琴而

無軫願借子以調其音婦人對曰吾野鄙之人也僻陋而無心五音不知安能調琴子貢以告孔子曰某知之矣抽絺綌五兩以授子貢曰善爲之辭以觀其語子貢曰吾北鄙之人也將南之楚於此有絺綌五兩吾不敢以當子身敢置之水浦婦人對曰客之行差遲垂人分其資財棄之野鄙吾年甚少何敢受子子不早去今竊有狂夫守之者矣詩曰南有喬木不可休思漢有游女不可求思此之謂也

喬樅謹案韓詩外傳載阿谷處子事與列女傳大致相同今錄其文字異者別識於左

彼婦人其可與言矣乎

案列女傳婦人作浣者下婦人俱作處女

思心譚譚

案列女傳作我思譚譚郝氏懿行曰皆燿字之假借也

何問婦人乎

案御覽七十四引作何問於婢子列女傳同

從流而挹之

案舊作促御覽引作從列女傳同趙舍人懷玉曰案上文迎是逆也

此云從乃順也作從為是當據之改正

和暢我心

案列女傳作私復我心

僻陋無心

案列女傳作陋固無心

抽締綌五兩以授子貢

案列女傳此文上有過賢則資四字

客之行差遲乖人

趙懷玉曰句有譌御覽八百十九作行客之人嗟然永久

列女傳同

今竊有狂夫守之者矣

案列女傳作竊有狂夫名之者矣

江之漾矣不可方思

韓詩曰江之漾矣不可方思○薛君曰漾長也

文選十一

王粲登樓賦注

喬樅謹案惠氏棟云說文兼下引詩江之兼矣韓詩同爾雅兼長也郭注云兼所未詳是未攷韓詩喬樅謂惠說尙未精審攷文選注引薛君曰漾長也是韓詩字作漾非作兼說文兼下引詩與爾雅兼長之訓皆據魯詩文也

汝墳

韓詩曰汝墳辭家也

後漢書周磐傳注

補後漢書周磐傳曰磐居貧養母儉薄不充嘗誦詩至汝墳之章慨然而漢廼解韋帶就孝廉之舉

喬樅謹案據此則磐所誦乃韓詩也

惕如輶饑

毛詩釋文怒韓詩作惕

喬樅謹案說文惕息貌讀與怒同衆經音義十六惕古文怒愬二形同釋文云調又作輶易林兌之噬嗑怒如周饑周即輶之省文周輶調皆以與朝音近通假晉郭遐周詩言別在斯須怒

焉如朝饑正用汝墳詩語

魴魚頰尾王室如媿雖則如焠父母孔邇

薛君章句曰頰赤也焠烈火也孔甚也邇近也言魴
魚勞則尾赤君子勞苦則顏色變以王室政教如烈
火矣猶觸冒而仕者以父母甚迫近饑寒之憂爲此
祿仕

後漢書周
磐傳注

說文火部焠火也詩曰王室如焠

案詩攷載後漢書注引韓詩王室如焠今本章懷
注作燬又外傳一引雖則如焠今本亦作燬皆誤
韓詩外傳一枯魚銜索幾何不蠹二親之壽忽如過

隙樹木欲茂霜露不使賢士欲成其名二親不待家
貧親老不擇官而仕詩曰雖則如煇父母孔邇此之
謂也

喬樅謹案霜露不使句本作不凋使說苑建本
篇引作不使趙懷玉校外傳據說苑以凋爲衍
字刪去

又外傳九孔子行聞哭聲甚悲孔子曰驅驅前有賢
者至則皐魚也被褐擁鎌哭於道孔子辟車與之言
曰子非有喪何哭之悲也皐魚曰吾失之三矣少而
學遊諸侯以後吾親失之一也高尚吾志閒吾事君

失之二也與友厚而小絕之失之三也夫樹欲靜而風不止子欲養而親不待往而不可追者年也去而不可見者親也吾請從此辭矣立槁而死孔子曰弟子誠之足以識矣於是門人辭歸而養親者十有三
人子路曰有人於斯風興夜寐手足胼胝面目黧黑樹藝五穀以事其親而無孝子之名何也孔子曰意者身未敬邪色不順邪辭不遜邪古人有言曰衣歟食歟曾不爾卽子勞以事其親無此三者何爲無孝之名意者所友非仁人邪坐語女雖國士之力不能自舉其身非無力也勢不便也是以君子入則篤孝

出則友賢何爲其無孝子之名詩曰父母孔邇

喬樅謹案荀子子道篇作衣與繆與不女耶楊
倞注引韓詩外傳作衣予教予與今本不同謝
墉荀子校語云今外傳九作衣與食與曾不爾
卽教予疑是飮予之訛卽字疑是耶之訛趙懷
玉亦云卽當作耶爲是

麟趾

吁嗟麟兮

薛君韓詩章句曰吁嗟歎辭也

文選三十一謝元暉和王著作八公山詩注

召南

草蟲

未見君子憂心惓惓

韓詩外傳一孔子曰君子有三憂弗知可無憂與知而不學可無憂與學而不行可無憂與詩曰未見君子憂心惓惓

采蘋

韓詩云沈者曰蘋浮者曰藻

毛詩釋文

喬樅謹案毛傳云蘋大萍也爾雅釋草曰萍萍郭注云水中浮萍江東謂之藻音瓢又曰其大

者蘋郭注云詩曰于以采蘋今據詩釋文引韓
詩云云是萍與蘋小大既殊浮沉亦異今本釋
文作浮者曰藻盧氏文昭謂王應麟詩攷作藻
音瓢當據以改正胡承珙曰案爾雅翼亦引韓
詩說沈者曰蘋浮者曰藻且云藻之字似藻說
者遂以相紊此言尤爲明證而埤雅引韓詩仍
作浮者曰藻遂謂藻亦出水上謬矣

于以鴈之惟錡及釜

漢書郊祀志注韓詩曰于以鴈之惟錡及釜

案說文無鴈字兩部蕭煮也从兩羊聲玉篇蕭式

羊切亦作𩇑𩇑同上廣韻𩇑亦𩇑字集韻十陽𩇑
或作𩇑𩇑𩇑類篇𩇑或作𩇑𩇑是說文𩇑字卽韓
詩于以𩇑之之異文也

喬樅謹案漢書郊祀志𩇑亨上帝鬼神師古注
云𩇑亨一也𩇑亨煮而祀也引韓詩采蘋于以
𩇑之二語爲證攷廣雅云𩇑飪也是𩇑爲古烹
飪字下亨乃古享祀字也音香兩反服虔音義
云以享祀上帝也正釋亨字師古以𩇑亨爲一
非是𩇑毛詩作湘古文同音假借字

甘棠

蔽芾甘棠勿刻勿伐召伯所茇

韓詩外傳二昔者周道之盛召伯在朝有司請營召以居召伯曰嗟以吾一身而勞百姓此非吾先君文王之志也於是出而就烝庶於阡陌隴畝之間而聽斷焉召伯暴處遠野廬於樹下百姓大悅耕桑者倍力以勸於是歲大稔民給家足其後在位者嚆轡不恤元元稅賦繁數百姓困乏耕桑失時於是詩人見召伯之所休息樹下美而歌之詩曰蔽芾甘棠勿剪勿伐召伯所茇此之謂也

喬樅謹案家語廟制篇引詩蔽芾甘棠與韓詩

文同諫辭載涼州刺史魏丕元碑作幣幣金薤
琳瑯載漢湯陰令張遷碑作蔽沛

漢書王吉傳吉召公述職當民事時舍於棠下而聽
斷焉是時人皆得其所後世思其人恩至乎不伐甘
棠甘棠之詩是也

喬樅謹案韓詩有王食長孫之學王謂王吉也
吉以韓詩教授爲昌邑中尉見漢書儒林傳及
本傳

毛詩釋文初簡反韓詩作剗

勿剗勿敗

集韻上聲五刻翦也韓詩曰勿刻勿敗

見二十六
產刻字注

喬樅謹案據毛詩釋文及集韻是韓詩翦作刻

與毛文異今本韓詩外傳引詩作翦蓋後人順

毛改之耳

補後漢書馮衍說廉丹曰人懷漢德甚於詩人思召
公也愛其甘棠而況子孫乎

補馮衍說鮑永曰以超周南之迹垂甘棠之風令大
功烈施於千載富貴傳于無窮

補藝文類聚孫楚賦曰昔在邵伯聽訟述職甘棠作
誦垂之罔極○又張纘賦曰伊宗周之令望巡召南

而述職

卷八十一

喬樅謹案述職之說本於魯韓詩孫張兩賦蓋

用韓義也

行露

雖速我訟亦不爾從

韓詩外傳二傳曰夫行露之人許嫁矣然而未往也
一物不具一禮未備守志貞理守死不往君子以爲
得婦道之宜故舉而傳之揚而歌之以絕無禮之求
防汙道之行詩曰雖速我訟亦不爾從

喬樅謹案此與列女傳說合是魯韓詩同義爾

毛詩作女女爾古字通用桑柔詩告爾憂恤誨爾序爵墨子尚賢篇引並作女是其證也

羔羊

羔羊之皮素絲五紵

韓詩羔羊曰羔羊之皮素絲五紵薛君章句曰小者曰羔大者曰羊素喻絜白絲喻屈柔紵數名也詩人賢仕爲大夫者言其德能稱有絜白之性屈柔之行進退有度數也

後漢書王渙傳注

喬樅謹案廣雅紵數也玉篇廣韻並云紵絜數也王氏廣雅疏證據春秋陳公子佗字五父以

證佗爲五數馬瑞辰曰今案佗字五父蓋取詩
五佗爲義非必紇卽五數也釋文佗作它云本
又作佗佗卽古他字管子輕重甲篇夫得居裝
而賣其薪芑一束十他他一本作倍墨子經篇
云倍爲二也他與倍通則他亦二數矣柏舟之
死矢靡他猶云有死無二也小雅人知其一莫
知其他猶云知其一不知其二也紇通佗蓋二
絲之數

逶迤逶迤自公退食

韓詩曰逶迤公正貌

毛詩
釋文

補洪适隸釋費鳳別碑君有逶迤之節自公之操

喬樅謹案婁機漢隸字源上平五云禕隋出韓
詩王厚齋詩攷云禕隋卽委蛇出韓詩內傳隸
釋衡方碑云禕隋在公今據經典釋文於毛詩
委蛇下云韓詩作逶迤是禕隋非韓詩經文乃
內傳釋經逶迤之訓也陳啟源曰毛詩委蛇傳
以爲行可從迹韓詩逶迤訓作公正貌兩義意
正相成惟其公正無私故舉動光明始終如一
可蹤迹倣效卽毛叙所謂正直也

雷其雷

廣韻六脂霽雷也出韓詩

補玉篇雨部霽隱也雷也

喬樅謹案臧鏞堂云玉篇霽隱也雷也似卽此
詩注喬樅攷集韻云霽隱也隱殷古字通用霽
訓隱雷隱或作輶亦作礲礲訓爲雷聲見通俗
文及玉篇則霽亦當爲雷聲矣禮記玉藻端行
頤雷如矢注云頤或爲霽釋文云霽音夷徐音
追中庸豈戎衣注云衣讀如殷聲之誤也齊人
言殷聲如衣案殷聲如衣霽音爲夷故殷霽占
得通假

菱有棣

孟子音義菱有梅丁云韓詩也

毛詩釋文梅木名也韓詩作棣

案毛詩釋文言棣不言菱孟子音義言菱不言棣
皆疎孫奭音義引丁云者唐丁公著也其言可信
武進臧庸輯韓詩遺說詆孫奭爲誤過矣

喬樅謹案菱集韻云草木枯落與漢書集注引
鄭氏云菱零落也義同

傾筐概之

補玉篇手部詩云傾筐概之

喬樞詩案毛詩傾筐壁之傳云壁取也是毛氏
古文以壁爲概之段借韓家今文當用概字爲
正

迫其謂之

韓詩云迫願也

毛詩釋文

喬樞謹案韓詩訓迫爲願卽孟子所云丈夫生
而願爲之有室女子生而願爲之有家也疑韓
說以此詩爲父母之詞

小星

夙夜在公實命不同

韓詩云實有也

毛詩釋文

喬樅謹案實毛詩作寔攷韓奕實墉實壑箋云實當作寔趙魏之間寔實同聲類升箋云實猶是也爾雅釋詁實是也是音義並同

韓詩外傳二曾子仕於莒得粟三秉方是之時曾子重其祿而輕其身親沒之後齊迎以相楚迎以令尹晉迎以上卿方是之時曾子重其身而輕其祿懷其寔而迷其國者不可與語仁窘其身而約其親者不可與語孝任重道遠者不擇地而息家貧親老者不擇官而仕故君子橋褊趨時當務爲急傳云不逢時

而仕任事而敦其慮爲之使而不入其謀貧焉故也
詩曰夙夜在公實命不同

喬樅謹案毛詩叙云小星惠及下也夫人無妬
忌之行惠及賤妾與韓詩說異客齋隨筆以此
詩是詠使者遠適夙夜征行不敢慢君命之意
用韓說也白帖引肅肅宵征夙夜在公入奉使
類亦用韓詩義

江有汜

江有渚

韓詩云水一溢一否曰渚

毛詩釋文

薛君韓詩章句曰水一溢而爲渚

文選二張衡西京賦注

喬樅謹案爾雅釋水云水中可居者曰洲小洲曰渚李巡曰四方皆有水中央獨高可處故云但大小異其名耳劉熙釋名云渚遮也體高能遮水使從旁迴也與爾雅訓義亦近韓詩云水一溢一否者謂一溢而一涸卽今俗所謂水濱之洲東埤而西漲者也毛傳云渚小洲也水枝成渚亦謂江水之枝分者溢而爲渚耳

何彼莪矣

毛詩釋文禮韓詩作莪

案家語孔子遊乎農山韓詩外傳九作戎山此禮
戎古通之證

喬樅譚案毛傳云禮猶戎戎也戎字當卽戎之
省文戎又通作茸旄邱詩狐裘蒙戎左傳云狐
裘蒙茸是其驗也說文艸部茸草茸茸貌然則
戎戎猶言茸茸耳

騶虞

韓詩說曰騶虞天子掌鳥獸官

周禮鐘
師疏

案五經異義云今詩韓魯說騶虞天子掌鳥獸官
古毛詩說騶虞義獸白虎黑文食自死之肉不食

生物人君有至信之德則應之周南終麟趾召南
終騶虞俱稱嗟歎之是麟與騶虞皆獸名謹案古
山海經鄒子書云騶虞獸說與毛詩同今攷文選
魏都賦張載注引魯詩傳曰古有梁騶梁騶天子
獵之田也東都賦李善注引騶作鄒禮記射義騶
虞樂官備也賈誼新書禮篇騶者天子之囿也虞
者囿之司獸者也儀禮鄉射禮注其詩有一發五
豝五縱于嗟騶虞之言樂得賢者衆多嘆思至仁
之人以克其官此皆與韓魯詩說合

韓詩遺說攷卷第一 一之二

福州陳壽祺學

男喬樅述

韓詩國風二

邶鄘衛

邶風柏舟

耿耿不寐如有殷憂

李善文選注十六韓詩曰耿耿不寐如有殷憂殷深

也陸士衡歎
逝賦注

喬樅謹案韓詩此二語又見文選二十三阮籍

咏懷詩注三十七劉琨勸進表注五十三稽康

養生論注殷深也之訓李善雖不言其爲誰氏訓義然上旣引韓詩殷憂爲證知亦用韓義也宋綿初云韓詩殷憂毛詩作隱憂殷與隱古字通也通俗文曰雷聲曰礮玉篇曰礮雷聲亦作輶毛詩召南殷其雷釋文殷音隱北門憂心殷殷釋文殷於巾反又音隱

補曹植洛神賦夜耿耿而不寐

我心匪鑒不可以茹

韓詩外傳一傳曰君子潔其身而同者合焉善其音而類者應焉馬鳴而馬應之牛鳴而牛應之非知也

其勢然也故新沐者必彈冠新浴者必振衣莫能以
已之皜皜容人之混汚然詩曰我心匪鑒不可以茹
我心匪石不可轉也我心匪席不可卷也

〔韓詩外傳二〕王子比干殺身以成其忠柳下惠殺身
以成其信伯夷叔齊殺身以成其廉此三子者皆天
下之通士也豈不愛其身哉爲夫義之不立名之不
顯則士恥之故殺身以遂其行由是觀之卑賤貧窮
非士之恥也天下舉忠而士不與焉舉信而士不與
焉舉廉而士不與焉三者存乎身名傳於世與日月
並而不息天不能殺地不能生當桀紂之世不之能

汚也然則非惡生而樂死也非惡富貴好貧賤也由
其理尊貴及已而仕也不辭也孔子曰富而可求也
雖執鞭之士吾亦爲之富而不可求從吾所好故既
窮而不憫勞辱而不苟然後能有致也詩曰我心匪
石不可轉也我心匪席不可卷也此之謂也

喬樅謹案說苑立節篇亦載此文唯柳下惠作
尾生爲異趙懷玉曰柳下惠不證岑鼎呂氏春
秋審已篇新序節士篇皆載之所謂成其信也
說苑作尾生此泥殺身而失之者也尾生之信
豈可與比干夷齊並論哉又富而不可求從吾

所好九字本皆脫佚案無此二句則上下語意不完今據說苑補入

又曰傳曰所謂士者雖不能備乎道術必有由也雖不能盡乎美善必有處也言不務多務審所行而已行既已尊之言既已由之若肌膚性命之不可易也詩曰我心匪石不可轉也我心匪席不可卷也

又曰原憲居魯環堵之室茨以蒿萊蓬戶甕牖桷桑而無樞上漏下濕匡坐而絃歌子貢乘肥馬衣輕裘中紺而表素軒車不容巷而往見之原憲楮冠黎杖而應門正冠則纓絕振襟則肘見納履則踵決子貢

曰嘻先生何病也原憲仰而應之曰憲聞之無財之謂貧學而不能行之謂病憲貧也非病也若夫希世而行比周而友學以爲人教以爲己仁義之匿車馬之飾衣裘之麗憲不忍爲之也子貢逡巡而有慙色不辭而去原憲乃徐步曳杖歌商頌而反聲淪於天地如出金石天子不得而臣也諸侯不得而友也故養身者忘家養志者忘身身且不愛孰能忝之詩曰我心匪石不可轉也我心匪席不可卷也

韓詩外傳九秦攻魏破之少子亡而不得令魏國曰有得公子者賜金千觔匿者罪至十族公子乳母與

俱亡人謂乳母曰得公子者賞甚重乳母當知公子處而言之乳母應之曰我不知其處誰知之死則死不可以言也爲人養子不能隱而言之是畔上畏死吾聞忠不畔上勇不畏死凡養人子者務生之非務殺之也豈可見利畏誅之故廢義而行詐哉吾不能生而使公子獨死矣遂與公子俱逃澤中秦軍見而射之乳母以身蔽之著十二矢遂不令中公子秦王聞之饗以太牢且爵其兄爲大夫詩曰我心匪石不可轉也

憂心悄悄惴于羣小

韓詩外傳二荆伐陳陳西門壞因其降民使修之孔子過而不式子貢執轡而問曰禮過三人則下二人則式今陳之修門者衆矣夫子不爲式何也孔子曰國亡而弗知不智也知而不爭非忠也亡而不死非勇也修門者雖衆不能行一於此吾故弗式也詩曰憂心悄悄慍于羣小小人成羣何足禮哉

補曹植黃初五年令夫遠而不可知者天也近而不可知者人也詩云憂心悄悄慍于羣小

寤寐有標

補玉篇子部寐附心也詩曰寤寐有標

喬樅謹案玉篇又云擗本亦作辟今毛詩作寗
辟釋文云辟本又作擘攷說文引詩作晤辟有
擗字不從手作擗此毛氏古文之假借三家今
文皆作寗擗玉篇所引是據韓詩今文陸氏音
義云毛本又作擘者亦擗字之通假也

胡載而微

韓詩云載常也

釋文

喬樅謹案載毛詩作迭攷廣雅迭代也則毛詩
迭微當訓爲更迭而食韓訓載爲常文義與毛
並異范家相詩潘曰胡常而微者言日月至明

胡常有時而微不照見我之憂思也此解爲得
韓義迭得通載者迭與秩通載字蓋載之或體
巧言詩秩秩大猷說文作載載又越字注云讀
若詩威儀秩秩是也載得訓常者韓蓋以載爲
秩之假借爾雅釋詁云秩常也又賓之初筵詩
不知其秩烈祖頌有秩斯祜毛傳並云秩常也
是其義已

燕燕

王氏詩攷燕燕韓詩以爲定姜歸其娣送之而作

喬樅謹案此詩攷引李迂仲語也今據後漢書

和熹鄧皇后紀云和帝葬後宮人並歸園太后
賜周馥貴人策曰朕與貴人託配後庭其歡等
列十有餘年不獲福祐先帝早棄天下孤心
煢靡所瞻仰夙夜永懷感愴發中今當以舊典
分歸外園慘結增歎燕燕之詩曷能喻焉後漢
書皇后紀言鄧后年十二通詩是時毛詩未立
學官鄧后之語本於三家而與定姜送姊之說
情事相合則是用韓詩也迂仲之言殆非無徵
范氏補傳以爲定姜歸其婦此本劉向列女傳
語乃魯詩之說非韓詩也

佇立以泣

〔禮〕曹植卞太后誄佇立以泣

仲氏任只

〔韓詩〕曰仲中也言位在中也

一初經音義九

案玉篇三人部引詩仲氏任只仲中也不云韓詩然與毛鄭義異而仲中也三字又與衆經音義引合則皆韓詩無疑也

日月

胡能有定

〔韓詩外傳〕九傳曰君子之間道入之于耳藏之于心

察之以仁守之以信行之以義出之以遜故人無不
虛心而聽也小人之聞道入之于耳出之于口苟言
而已譬如飽食而嘔之其不惟肌膚無益而於志亦
戾矣詩曰胡能有定

乃如之人兮德音無良

韓詩外傳一魯公甫文伯死其母不哭也季孫聞之
曰公甫文伯之母貞女也子死不哭必有方矣使人
問焉對曰昔是子也吾使之事仲尼仲尼去魯送之
不出魯郊贈之不與家珍病不見士之視者死不見
士之流淚者死之日宮女纓經而從者十人此不足

於士而有餘於婦人也吾是以不哭也詩曰乃如之人兮德音無良

報我不術

韓詩曰報我不術○薛君曰術法也

文選五十五劉峻廣絕交論注

喬樅謹案毛詩釋文述本亦作術宋綿初云術術音義同士喪禮筮人許諾不述命注云古文述皆作術祭義術省注云術省當爲述省賈山至言術追厥功孟郁堯廟碑歌術功稱韓勅修孔廟後碑共術德政靈臺碑陰州里偁術樊敏碑臣子褒術義皆作述唐君頌毓樂道述義又

作術是其證也

終風

終風且暴

韓詩曰終風西風也

釋文

薛君韓詩章句曰時風又且暴使已思益隆

文選二十四陸

機爲顧彦先贈婦詩注

喬樅謹案王氏經義述聞云毛詩終風爲終日

風韓詩終風爲西風此皆緣辭生訓非經文本

義終猶旣也言旣風且暴也胡承珙曰案王風

葛藟終遠兄弟傳云兄弟之道已相遠矣是毛

公非不知終有既訓而於終風必云終日風者
自由師說相承且三章不日有暄不日者謂不
旋日而又暄也此終日亦對下不日言之耳至
韓詩以終風爲西風終之與西殊不相涉疑本
作泰風故韓依爾雅釋爲西風說文夙古文終
又冬古文作夙又泰古文作夙是終與泰古文
形近易溷又終亦爲衆儀禮士相見禮注今文衆爲終集韻衆
古作唇列子周穆王篇奢尙爲右殷敬順釋文
奢篆作泰唇與奢形亦相近韓詩自作泰風與
毛師承各異無足怪也胡說亦通

誑浪笑傲

韓詩曰浪起也

釋文

喬樅謹案毛詩正義引爾雅舍人注曰浪意萌也意萌邢疏引作意朗臧庸堂據邢疏舊本定萌字爲誤馬瑞辰曰朗謂高朗放浪與高朗義近放浪則意氣高與韓詩浪起也義亦相通

願言則嚏

補玉篇口部嚏噴鼻也詩云願言則嚏

喬樅謹案毛詩作走傳云走劫也釋文走本作嚏又作寔崔云毛訓走爲劫今俗人云欠欠劫

欵是也不作劫字鄭箋讀奄爲不敢嚏咳之嚏
今俗人嚏云人道我此古之遺語也今據玉篇
引詩直作嚏字是據韓詩之文鄭君先通韓詩
此箋卽用韓義改毛也

壇壇其陰

韓詩章句曰壇壇天陰塵也

詩攷引董氏云

喬樅謹案說文日部嚏陰而風也詩曰終風且
嚏又土部壇天陰塵也詩曰壇壇其陰又玉篇
土部云壇天陰塵起也是嚏與壇字異而義亦
殊馬瑞辰曰嚏則陰而有風壇則不必有風而

常陰有塵韓詩作壇壇爲正字毛詩作曠曠段
借字也胡承珙曰天陰塵起有風可知訓雖小
異義實通也

補後漢書馮衍顯志賦曰曠曠其將暮兮。李賢注
曠曠陰晦貌也詩曰曠曠其陰

喬樅謹案敬通用韓詩曠曠當作壇壇爲正此
後人轉寫依毛詩改之

擊鼓

上國城漕我獨南行

韓詩說曰年二十行役三十受兵六十還兵詩正義引異義

韓詩外傳曰二十行役六十免役

後漢書班超傳注

案周禮鄉大夫及大胥疏禮記王制正義後漢書注四十七引異義韓詩說同太平御覽卷三百六引白虎通曰王命法年三十受兵何重絕人世也師行不必反戰不必勝故須其有世嗣也年六十歸兵者何不忍闕人父子也與韓詩傳說同又漢書高帝紀二年注孟康曰古者二十而傅三年耕有一年儲故二十三而後役之景帝紀二年令天下男子年二十始傅師古曰傅著也言著民籍給公家徭役也韓詩說二十行役亦與周禮國中七

尺以及六十皆征之說合

死生契闊

韓詩曰契闊約束也

釋文

喬樅謹案李善注文選劉琨答盧諶詩又引韓詩章句曰括約束也韓詩解契闊爲約束是以契闊爲絜括之段借說文糸部絜麻一耑也段氏注云一耑猶一束也手部括絜也又人部係絜束也又糸部約纏束也玉篇絜結束也約束也絜括之爲約束此其義已胡承珙曰死生絜括者言死生相與約結不相離棄也後漢繁欽

定情篇何以致契闊繞腕雙跳脫魏武帝短歌
行曰越陌度阡枉用相存契闊談讌心念舊恩
此皆以契闊爲約結之義正與韓詩說同

于嗟夙兮

〔毛詩釋文〕洵韓詩作夙夙亦遠也

喬樅謹案盧文昭云高誘呂氏春秋盡數篇注
亦引詩作于嗟夙兮按夙亦遠也是陸氏語因
毛傳云洵遠故此云亦遠也喬樅謂高誘呂覽
注云夙遠也引詩于嗟夙兮爲證自是三家詩
訓義云然陸氏第蒙毛傳洵遠之訓故於韓詩

翼下加亦字耳翼遠之義要本諸韓故非陸氏
意揣之語也

凱風

簡簡黃鳥載好其音

太平御覽羽族部韓詩曰簡簡黃鳥載好其音

卷九百二

三十

喬樅謹案段氏玉裁云毛詩睪睪雙聲此簡簡
當本是雙聲字御覽誤重簡字爾喬樅案宋槧
本引韓詩作簡斤黃鳥斤字乃反之譌疑韓詩
本作簡販黃鳥轉寫脫去目旁僅存其半爲反

字攷說文目部眅白眼也引春秋傳游眅字子明爲證是眅有明義簡亦明也故以簡眅與顏色之明好一說戰國策田髡高誘注讀鄭游眅之眅說文髡轉目視也集韻云髡同眅則眅卽髡之通假也簡亦當爲眅之通假說文眅戴目也江淮之間謂眅曰眅方言云眅眅眅也吳楚江淮之間或曰眅或曰眅自關而西秦晉之間曰眅玉篇眅眅也廣韻眅眅並訓爲目多白貌目眅眅則睛多白是眅眅皆謂目之轉視流眅故爲顏色之悅也其義亦通又毛傳云眅眅好

貌眈眈之義亦宜爲眈眈陳思王洛神賦所謂
明眸善睐者是也若如說文訓眈爲目出玉篇
訓眈爲出目則不得云好貌眈眈蓋卽眈眈之
假借毛詩角弓見眈聿消荀子書作宴然聿消
此見宴字通之證眈集韻云或作眈此眈眈字
通之證說文眈目相戲也方言眈眈視也東齊
曰眈吳揚曰眈凡以目相戲曰眈玉篇眈小嫵
媚也新臺詩燕婉之求說文引作眈眈之求眈
眈亦卽眈眈皆好貌也

雄雉

雄雉于飛

薛君韓詩章句曰雉耿介之鳥也

文選九嶞岳射雉賦注

瞻彼日月悠悠我思道之云遠曷云能來

韓詩外傳二賢者精氣闐溢而後傷時不可過也不見道端乃陳情欲以歌道義詩曰靜女其姝俟我乎城隅愛而不見搔首躊躇瞻彼日月悠悠我思道之云遠曷云能來急時辭也是故稱之日月也

案據外傳是韓詩以此篇與靜女爲類說苑引詩亦同惟悠悠作遥遥蓋從魯詩之文

不忤不求何用不臧

韓詩外傳一傳曰喜名者必多怨好與者必多辱唯
滅迹於人能隨天地自然爲能勝理而無愛名名與
則道不用道行則人無位矣夫利爲害本而福爲禍
先唯不利者爲無害不求福者爲無禍詩曰不忮不
求何用不臧

又曰傳曰聰者自聞明者自見聰明則仁愛著而廉
恥分矣故非其道而行之雖勞不至非其有而求之
雖強不得故智者不爲非其事廉者不求非其有是
以害遠而名彰也詩曰不忮不求何用不臧

又曰傳曰安命養性者不待積委而富名號傳乎世

者不待勢位而顯德義暢乎中而無外求也信哉賢者之不以天下爲名利者也詩曰不忮不求何用不

臧

匏有苦葉

深則厲淺則揭

韓詩曰至心曰厲

釋文

喬樅謹案魯詩訓二以衣涉水曰厲見包咸論語注爾雅云由帶以上爲厲爾雅亦魯詩之學也韓詩至心曰厲卽所云由帶以上其義與魯

詩同

韓詩外傳一楚白公之難有莊之善者辭其母將死
君其母曰棄母而死君可乎曰聞事君內其祿而外
其身今之所以養母者君之祿也請徃死之比至朝
三廢車中其僕曰子懼何不反也曰懼吾私也死君
吾公也吾聞君子不以私害公遂死之君子聞之曰
好義哉必濟矣夫詩云深則厲淺則揭此之謂也

喬樅謹案漢書古今人表有嚴善列中中第五
等卽外傳所云莊之善避明帝諱改莊字爲嚴
也新序義勇篇正作莊善無之字俗本外傳作
仕之善者古莊壯通用因譌壯爲仕趙懷玉校

本据新序改正是已渚宮舊事注引新序作莊
義疑義又善之譌字也

煦日始旦

薛君韓詩章句曰煦暖也

文選五十五陸士衡演連珠注

喬樅謹案煦日毛詩作旭日傳云旭日始出謂
大昕之時文與韓異攷說文煦烝也一曰赤貌
一曰晝潤也又日部煦日出晝也晝義與暖同
周禮注引司馬法曰旦明鼓五通爲發煦是煦
亦訓爲日始出旭煦一聲之轉韓詩煦字當亦
煦之通假胡承珙曰易盱豫釋文盱姚作盱云

日始出引詩盱日始出今攷姚所引詩當作盱
从干不從于說文三篇皆無盱字說文盱雖訓
晚然日部又云睪盱也玉篇睪明也盱也是盱
有明義故爾雅釋天注言氣睪盱釋文云盱日
光出也文選上林賦采色睪盱景福殿賦睪盪
盱盱丹采煌煌皆取光明之義毛詩釋文旭許
玉反徐又許袁反案盱从干讀與軒同許袁反
正其音是徐所見本亦必作盱日始且與姚氏
同也

士如歸妻待冰未泮

韓詩傳曰古者霜降迎女冰泮殺止

周禮媒氏疏引王肅聖證論

喬樅謹案荀卿書云霜降迎女冰泮殺止韓詩語與荀子同胡承珙曰嫁娶時月毛鄭異說東門之楊傳云男女失時不逮秋冬鄭君則據周禮仲春之月令會男女以仲春爲婚月案毛韓之義皆本於荀卿管子幼官篇春三亞十二始亞合男女秋三亞十二始亞合男女管子所謂秋始亞在白露之後卽荀子之霜降迎女也春始亞在清明之後卽荀子之冰泮殺止也通典引董仲舒書曰聖人以男女當天地之陰陽天

地之道向秋冬而陰氣來向春夏而陰氣去故古之人霜降而迎女冰泮而殺止與陰俱近與陽俱遠也太元亦云納婦始秋分管荀皆周秦古書董楊又漢代大儒說皆後先昭合其義不可易矣王肅云自馬氏以來乃因周官而有二月蓋鄭說本於馬融至馬昭申鄭援證諸詩則孔晁答云有女懷春謂女惡無禮過時故思春日遲遲蠶桑始起女心悲矣疇彼小星喻妾侍夫人蔽芾其樛喻行遇惡人熠燿其羽喻嫁娶盛飾皆非仲春嫁娶之候其說皆孔優於馬若

張融所據夏小正二月綏多士女恐亦期盡蕃育之法其實鄭正據定在周官今攷周官媒氏云掌萬民之判凡男女自成名以上皆書年月日名焉令男三十而娶女二十而嫁凡娶判妻入子者皆書之中春之月令會男女於是時也奔者不禁若無故而不用令者罰之詳玩經文所謂判妻入子皆書之自是霜降之候正以昏禮其下云云乃期盡蕃育之法蓋自中春以後農桑事起婚姻過時故於是月令會男女其或先因札喪凶荒六禮未備者雖奔不禁所謂不

待禮聘因媒請嫁而已若中春非爲期盡則正
昏之月何用汲汲而先下此不禁奔之令乎此
誤會經文之失也惠氏禮說云左傳襄二十二
年十二月鄭游販將如晉未出境遭逆妻者奪
之則春秋時民間嫁娶亦在秋冬也說甚精確
招招舟子

韓詩云招招聲也

釋文

喬樅謹案毛傳云招招號召之貌此云聲者攷
王逸楚詞注云以口曰召以手曰招號召必手
招之故毛以貌言手招亦必口呼之故韓以聲

言也合毛韓二家其義始備

谷風

密勿同心不宜有怒

韓詩曰密勿同心不宜有怒密勿儺儺也

文選三十
九傳季友

爲宋公求加贈
劉將軍表注

喬樅謹案密勿毛詩作甬勉釋文云甬本亦作
甬甬勉猶勉勉也攷毛詩小雅十月之交甬勉
從事漢書劉向傳引作密勿從事然則此谷風
甬勉同心魯詩當亦作密勿同心與韓詩文同
爾雅釋詁甬沒勉也郭注云甬沒猶甬勉釋文

驅本或作𧈧說文𧈧古密字儀禮士冠禮設局
𧈧鄭注云古文𧈧爲密是爾雅𧈧沒卽魯詩密
勿之通假也馬瑞辰曰𧈧勉密勿𧈧沒皆雙聲
字故通用玉篇𧈧部𧈧勉也𧈧又驅字之俗耳
漢書五行志中之上閔免遯樂師古注閔勉猶
𧈧勉也竝字異而音義同閔免又轉爲文莫說
文恣自勉強也慎勉也廣雅文勉也楊升菴丹
鉛錄引晉樂肇論語駁云燕齊謂勉強爲文莫
是也𧈧勉皆爲勉故釋文曰猶勉勉也勉勉亦
作勿勿祭義鄭注勿勿猶勉勉是也

采葑采菲無以下禮

詩攷引外傳

案今本韓詩外傳禮作體與詩攷引異

韓詩外傳九孟子妻獨居踞孟子入戶視之白其母曰婦無禮請去之母曰何也曰踞其母曰何知之孟子曰我親見之母曰乃汝無禮也非婦無禮禮不云乎將入門問孰存將上堂聲必揚將入戶視必下不掩人不備也今汝往燕私之處入戶不有聲令人踞而視之是汝之無禮也非婦無禮也於是孟子自責不敢去婦詩曰采葑采菲無以下體

喬樅謹案禮毛作體今本外傳乃後人據毛所

改攷韓詩外傳五云禮者則天地之體是禮字
本訓體故體禮得相通假馮登府云案釋名禮
體也得其事體也廣雅釋言禮體也義皆本韓
詩又問孰存三字舊本無之今據列女傳母儀
篇補

補玉篇艸部葑蕪菁也詩曰采葑采菲

喬樅謹案毛傳云葑須也菲芴也箋云此二菜
者蔓菁與菘之類也此直以葑爲蕪菁當据韓
詩之說

中心有違

韓詩曰違很也

釋文

喬樅謹案廣雅釋詁怨違很也卽本韓詩訓義
毛傳違離也鄭箋云違徘徊也行於道路之人
至於將別尚舒行其心徘徊然喻君子於已不
能如也胡承珙曰毛訓違爲離蓋謂有違者爲
有離別之意釋文引韓詩云違很也案說文很
不聽從也一曰行難也韓詩以違爲很卽行難
之義毛韓鄭三說略同馬瑞辰曰韓詩蓋以違
爲悻之假借故訓爲很很亦悻也書無逸民否
則厥心違怨違與怨同義申心有違猶云中心

有怨也其義亦通

湜湜其止

補玉篇水部湜水清也詩曰湜湜其止

喬樅謹案毛詩作湜湜其止箋云小渚曰湜湜持正貌與此文異訓異知玉篇與說文水部引詩皆据韓家之文白帖七引詩亦作湜湜其止唐惟韓詩尚存尤足證玉篇所引之爲韓詩異文也

母發我笱

韓詩曰發亂也

釋文

喬樅謹案周官敝人掌以時敝爲梁鄭司農注
梁水堰堰水而爲闕空以筍承其空說文云筍
曲竹捕魚筍也從竹句句亦聲馬瑞辰曰梁與
筍相爲用故詩言逝梁卽言發筍筍從竹句句會
意筍之言句句曲也謂以曲竹爲之使其口可
入而不可出程大昌演繁露引唐書王君郭傳
云君郭無行善盜負竹筍如魚具內置逆刺見
鬻繪者以筍承其頭不可脫乃奪繪去今時取
魚者亦多爲逆刺有門可開淮南兵略篇云發
筍門是其制也發宜訓開韓詩訓爲亂失之喬

從謂韓詩訓亂是以發爲撥之通借釋名釋言語云撥播也播使移散也移散卽亂之義梁者築堰以障水中爲闕空以曲竹作筍而取魚以筍承梁之空筍之曲竹非一必理之使與闕空相承乃可以捕魚故云無亂我筍謂勿移散之使魚得脫也馬以韓詩訓亂爲失疏矣

凡民有喪匍匐救之

韓詩外傳一晉靈公之時宋人殺昭公趙宣子請師於靈公而救之靈公曰非晉國之急也宣子曰不然夫大者天地其次君臣所以爲順也今殺其君所以

反天地逆人道也天必加災焉晉爲盟主而不救天
罰懼及矣詩云凡民有喪匍匐救之而況國君乎於
是靈公乃興師而從之宋人聞之儼然感悅而晉國
曰昌何則以其誅逆存順詩云凡民有喪匍匐救之
趙宣子之謂也

喬樅謹案匍匐魯齊詩作扶服文與毛韓異匍
匐毛傳無訓劉熙釋名云匍匐小兒時也匍猶
捕也匍猶伏也人雖長大及其求事用力之勤
猶亦稱之其義卽本於韓故鄭箋云匍匐言盡
力也蓋用韓義申毛

又外傳五孔子抱聖人之心彷徨乎道德之域逍遙
乎無形之鄉倚天理觀人情明終始知得失故興仁
義厭勢利以持養之于時周室微王道絕諸侯力征
強劫弱衆暴寡百姓靡安莫之紀綱禮義廢壞人倫
不理於是孔子自東自西自南自北匍匐救之
既阻我德賈用不售

韓詩曰既阻我德賈用不售一錢之物舉賣百何時

當售乎

太平御覽八百三十五

喬樅謹案毛詩釋文售布救反唐石經初刻售
字作讎後磨改爲售字段氏玉裁云讎正字售

俗字史記漢書尚多用讎阮氏校勘記云考釋
文本作售石經磨改所從也今據太平御覽引
韓詩亦爲售字蓋俗通用之

有洸有潰

韓詩曰潰潰不善之貌

釋文

喬樅謹案毛傳云潰潰怒也怒亦不善之貌義
與韓同詩有洸有潰而此引作潰潰者長言之
也箋云君子洸洸然潰潰然無溫潤之色皆以
洸洸潰潰重文言之與此正同禮記樂記引詩
肅雍和鳴而釋之曰肅肅敬也雍雍和也夫敬

有干戚而無羽籥也左氏隱五年傳考仲子之
宮將萬焉公問羽數於衆仲亦足爲萬兼羽籥
之明證孔氏正義謂羽爲籥不得爲萬引孫毓
評以毛爲失過矣韓詩說云萬以夷狄大鳥羽
義皆與毛同

碩人扈扈

韓詩曰扈扈美貌

釋文

喬樞謹案毛詩作碩人俟俟傳云俟俟容貌大
也文與韓異攷禮記檀弓爾毋扈扈爾鄭注云
扈扈謂大也是扈扈本訓爲大容貌大卽美之

義也馬瑞辰曰方言吳大也說文吳大言也俱從吳聲故義亦爲大俱扈音近美大亦同義俱扈通用猶左氏圉人犇公羊傳作鄧扈樂扈卽圉之段借也

左手執龠

補玉篇龠部龠樂之所管三孔以和衆聲也詩云左毛執龠今作簫

喬樅謹案毛詩作簫傳云簫六孔與此說異則此所載是据韓詩之說周禮注云簫如笛三孔舞者所吹也引詩左手執簫爲證正用韓家詩

說廣韻十八樂云簫樂隄郭璞云如笛三孔而短小廣雅云七孔蓋古樂失傳師述各據所聞故說多不同耳

右手秉翟

韓詩說萬以夷狄大鳥羽

毛詩疏引異義

喬樅謹案五經異義又引公羊說樂萬舞以鴻羽取其勁輕一舉千里詩毛說萬以翟羽許君謹案詩云右手秉翟爾雅說翟鳥名雉屬也知翟羽舞也今據韓詩說則不以翟爲雉屬矣段玉裁云韓詩右手秉翟蓋作秉狄廣雅釋詁狄

羽也正釋韓詩秉狄之訓段說是也

泉水

祕彼泉水

毛詩釋文愁韓詩作祕

篇海祕璧吉反韓詩云祕刺也

喬樅謹案祕字訓刺者方言十二云祕刺也祕
祕音同義通韓詩訓祕爲刺蓋以祕爲泌之段
借泌字同澤采菽詩熾沸濫泉說文引作澤沸
濫泉爾雅釋水濫泉正出正出涌出也公羊昭
五年傳云瀆泉者何直泉也直泉者何涌泉也

是正出卽直出之義刺說文訓直傷也是刺亦有直義廣雅釋邱云邱上有水曰泌邱水出邱上卽正出之直泉故稱曰泌邱也

飲餞于坭

薛君韓詩章句曰送行飲酒曰餞

文選二十謝靈運送孔令詩注○又

四十六顏延之曲水詩序注

毛詩釋文補地名韓詩作坭

喬樅謹案鄭注士虞禮引詩飲餞于補釋文補劉本作泥作泥者亦三家詩之異文段氏玉裁曰泉水之補韓詩作坭當卽泥中之地廣韻坭

北門

王事敦我

韓詩曰敦迫也

釋文

喬樅謹案後漢書韋彪傳以禮敦勸注云敦猶逼也班固傳靡號師矢敦奮擣之容注云敦猶迫逼也義皆同韓詩毛傳訓敦爲厚胡承珙曰敦與督一聲之轉廣雅督促也督又與篤通篤有厚義而通於督促故敦有厚義而亦可訓爲

從迫毛言敦厚猶云敦篤其實與韓同意也

室人交徧譴我

韓詩曰譴就也

釋文

喬樅謹案毛詩室人交徧摧我釋文云摧或作
催韓詩作譴今攷說文催相擣也引室人交徧
催我與釋文所云或本合毛詩摧沮也鄭箋云
摧者刺譏之言是鄭用韓詩譴字爲義故以爲
刺譏之言譴訓爲就者廣雅釋詁云譴就也正
用韓詩之訓馬瑞辰曰譴就以雙聲爲義就通
作蹇蹇與蹇同廣雅蹇罪也廣韻蹇迫也與玉

篇謹謫也義正合桂馥疑就爲說之誤未確

亦已焉哉天實爲之謂之何哉

韓詩外傳二仁道有四礫爲下有聖仁者有智仁者有德仁者有礫仁者上知天能用其時下知地能用其財中知人能安樂之是聖仁者也上亦知天能用其時下知地能用其財中知人能使人肆之是智仁者也寬而容衆百姓信之道所以至弗辱以時是德仁者也廉潔直方疾亂不治惡邪不匡雖居鄉里若坐塗炭命入朝廷如赴湯火非其民不使非其食弗嘗疾亂世而輕死弗顧弟兄以法度之比於不祥是

礪仁者也傳曰山銳則不高水徑則不深仁礪則其德不厚志與天地擬者其人不祥是伯夷叔齊卞隨介子推原憲鮑焦袁旌曰申徒狄之行也其所受天命之度適至是而亡弗能改也雖枯槁弗捨也詩云亦已焉哉天實爲之謂之何哉礪仁雖下然聖人不廢者匡民隱括有在是中者也

又曰鮑焦衣弊膚見挈舂持蔬過子貢於道子貢曰吾子何以至於此也鮑焦曰天下之遺德教者衆矣吾何以不至於此也吾聞之世不已知而行之不已者是與行也上不已用而干之不止者是毀廉也行

爽廉毀然且弗舍惑於利者也子貢曰吾聞之非其
世者不生其利汙其君者不履其土今吾子汙其君
而履其土非其世而持其蔬詩曰普天之下莫非王
土此誰之有哉鮑焦曰於戲吾聞賢者重進而輕退
廉者易愧而輕死於是棄其蔬而立槁於洛水之上
君子聞之曰廉夫剛哉夫山銳則不高水徑則不深
行礪者德不厚志與天地擬者其爲人不祥鮑焦可
謂不祥矣其節度深淺適至於是矣詩云亦已焉哉
天實爲之謂之何哉

又曰申徒狄非其世將自投於河崔嘉聞而止之曰

吾聞聖人仁士之於天地之間也民之父母也今爲
濡足之故不救溺人可乎申徒狄曰不然昔桀殺關
龍逢紂殺王子比干而亡天下吳殺子胥陳殺泄冶
而滅其國故亡國殘家非無聖智也不用故也遂抱
石而投於河君子聞之曰廉矣如仁歟則吾未之見
也詩曰天實爲之謂之何哉

喬樅謹案毛詩作已焉哉無亦字又今爲濡足
之故句本譌作儒雅之故今據新序節士篇改

正

補曹植求通親親表然天寔爲之謂之何哉

北風

攜手同行

補曹植七啟時與吾子攜手同行

靜女

靜女其姝俟我乎城隅愛而不見搔首躊躇

韓詩曰靜貞也文選十五張衡思元賦注○又十九宋玉神女賦注○又二十曹植洛神

注賦

韓詩曰愛而不見搔首躊躇○薛君曰躊躇躑躅也

文選十五思元賦注

案愛而不見二語又見文選琴賦注搔首躊躇句

又見向秀思舊賦王褒洞簫賦左思招隱詩何劭
贈張華詩注惟爾衡鵲賦注引作踟躕誤今本
韓詩外傳亦誤作踟躕

韓詩外傳一賢者精氣閎溢而後傷時不可過也不
見道端乃陳情欲以歌道義詩曰靜女其姝俟我乎
城隅愛而不見搔首踟躕

喬樅謹案說文足部云踟踟不前也又云踟
躕逗足也踟踟卽踟躕踟躕卽躑躅逗足者不
前之貌也廣雅云踟躕踟躕也又云躊躇猶豫
也踟躕亦卽躑躅猶豫者不前之意也皆以雙

聲疊韻字相通用音近故義亦同

新臺

新臺有濯河水泥泥

韓詩曰濯鮮貌泥泥盛貌

釋文

喬樅謹案毛詩新臺有洒釋文云韓詩作泥泥音尾段氏同又河水浼浼釋文云韓詩作泥泥音尾段氏玉裁曰按此必首章新臺有泚河水瀾瀾之異文濯泥字與泚瀾同部與洒浼不同部又毛傳泚鮮明貌韓詩濯鮮貌毛傳浼浼盛貌是其爲首章異文陸德明誤屬之二章也馬瑞辰曰按

洒與洗雙聲古通用白虎通洗者鮮也呂氏春
秋高注洗新也又與銑通韋昭晉語注銑猶洒
也韓詩洒作濯者玉篇滓與濯同詩有濯者淵
本或爲萃洒通作濯猶洗通作萃皆異部假借
也儀禮釋文洗悉禮反劉本作滓七對反是其
類矣段謂濯爲泚之異文非也說文繫傳引詩
新臺有濯云字本作滓說文滓新也廣韻滓新
水狀也亦與韓詩訓濯爲鮮同義又說文潤字
注水流浼浼貌浼與潤音相近浼浼卽潤潤之
段借玉篇泚泚水流貌浼浼通作泚泚猶勉勉

通作疊疊皆一聲之轉也段以韓字泥泥爲上
章彌彌之異文但取字之同部不知雙聲字古
亦通用也

嫵婉之求

韓詩曰嫵婉之求嫵婉好貌

文選西京賦注

補玉篇女部詩云嫵婉之求

喬樅謹案毛詩作燕婉傳訓燕爲安說文作𦞦
云目相戲從目晏聲詩曰𦞦婉之求字皆與韓
異許氏所引蓋齊魯之異文也

魚網之設鴻則離之嫵婉之求得此戚施

太平御覽羽族部韓詩曰魚網之設鴻則離之熇婉
之求得此戚施薛君曰戚施蟾蜍蜥蜴喻醜惡卷九
百四

九十

喬樅謹案蟾蜍卽蟾蜍淮南子原道訓云蟾蜍
捕蚤高誘注曰蟾蜍也蜥卽戚施說文鼃部
鼃云无鼃詹諸也其鳴詹諸其皮鼃鼃其行无
无從鼃從无无亦聲重文鼃云鼃或從酋鼃云
鼃鼃詹諸也詩曰得此鼃鼃言其行鼃鼃从鼃
爾聲許所引詩與魯韓毛文並異蓋據齊詩而
其訓釋則與韓詩說合曰其行鼃鼃又曰其皮

蠢蠢其行无无皆喻其醜惡之貌也

韓詩遺說攷卷第一

(一之三)

福州陳壽祺學

男喬樅述

韓詩國風三

邶風柏舟

母也天只

補三國志曹植疏柏舟有天只之怨

實惟我直

韓詩云直相當值也

釋文

喬樅謹案毛詩實惟我特傳云特猶匹也特字古與殖通禮記少儀不特弔釋文云特本作殖

爾雅釋水土特舟釋文云特本作犗此特犗字
通之證直義又與特犗同周官小胥士特縣賈
子新書作大夫直縣直縣卽特縣也禮記郊特
牲首也者直也注云直或爲犗呂覽忠廉篇高
誘注特猶直也荀子勸學篇楊倞注特猶言直
也此特直義同之證韓詩訓直爲相當值者漢
書刑法志不可以直秦之銳士注云直亦當也
當有敵義相當猶言相匹耳史記封禪書遂因
其直北集解引孟康曰直值也又匈奴傳曰直
上谷索隱引姚氏曰古字例以直爲值是已

牆有茨

中葍之言

韓詩云中葍中夜謂淫僻之言也

釋文

玉篇六部葍夜也詩曰中葍之言中夜之言也

喬樅謹案玉篇又云葍本亦作葍臧鏞堂曰此雖不言韓詩然與釋文引合則爲韓詩無疑喬樅謂魯家亦訓中葍爲中夜見漢書文三王傳晉灼注是魯詩之說與韓詩同

不可揚也

韓詩云揚猶道也

釋文

喬樅謹案揚毛詩作詳與韓文異廣雅揚說也
說亦與道義同馬瑞辰曰毛詩詳字卽揚之同
音假借三章不可讀也傳訓讀爲抽今按廣雅
讀說也不可讀正當訓爲不可說猶前章不可
道不可揚也據釋文云詳韓詩作揚廣雅揚說
也義本韓詩則訓讀爲說亦當本韓詩

君子偕老

委委佗佗

韓詩曰佗佗德之美貌

釋文

韓詩曰透佗德之美貌也

衆經音義
三十九

喬樅謹案韓詩於羔羊詩逶迤訓爲公正貌逶迤與逶佺同故此詩委委佗佗訓爲德之美貌也毛傳云委委行可委曲從迹也佗佗德平易也毛所云行與德對文當讀爲德行之行非謂其行步之美也爾雅釋訓禕禕佗佗美也舍人注云禕禕者心之美引此詩云禕禕佗佗亦主內德而言與韓詩委佗並訓爲德之美貌正合是魯毛訓義皆與韓同李巡孫炎訓爲容儀行步之美自是注爾雅者別爲一解詩正義引李孫說以證毛傳之行可委曲從迹爲行步之步

其說非是委卽禕字文選東京賦漢帝之德侯
其禕而薛綜注云禕美也是禕爲德之美又大
元元攤夫地他然示人明矣注云他猶泰也他
卽佗字泰謂安泰是亦德之美也

玉之𧈧也

補玉篇耳部詩云玉之𧈧也𧈧克耳也

喬樅謹案玉篇又云𧈧亦作𧈧本亦作瑱攷說
文引詩作玉之瑱兮毛詩玉之瑱也傳云瑱塞
耳也釋文於瑱下不言本或作𧈧則毛本諸家
均無異字知野王所引詩是据韓家之文

邦之援也

韓詩曰援助也

釋文

喬樅謹案援毛詩作媛魯與毛同並訓爲美女
釋文本作援取也許烜云爾雅美女爲媛孫炎
注云君子之援助此取字乃助之譌臧鏞堂云
鄭箋媛者邦人所依倚以爲援助當是從韓詩
說

鶉之奔奔

鶉之奔奔鶉之疆疆

韓詩云奔奔疆疆乘匹之貌

釋文

案鄭箋云奔奔疆疆言其居有常匹飛則相隨之貌刺宣姜與頑非匹耦與韓詩合鄭用韓義箋毛也

喬樅謹案乘匹謂乘居匹處列女傳曰夫關雎之鳥猶未嘗見其乘居而匹處也夫男女之盛合之以禮則父子生焉君臣成焉故爲萬物始關雎鷺而有別性不雙侶故君子美之以爲淑女好逮之咏鷓鴣雖乘居匹處然尚能不亂其類故詩人以刺宣姜謂會鷓鴣之不若也

補曹植魏德論鵲之疆疆詩人取喻

人而無良我以爲兄

詩攷引
外傳

喬樞謹案今本韓詩外傳而字作之改與毛詩
同詩攷所引蓋未改之本也今據之改正

韓詩外傳九子貢曰人善我我亦善之人不善我我
不善之子貢曰人善我我亦善之人不善我我則引
之進退而已耳顏回曰人善我我亦善之人不善我
我亦善之三子所持各異問於夫子夫子曰由之所
言蠻貊之言也賜之所言朋友之言也回之所言親
屬之言也詩曰人之無良我以爲兄

定之方中

星言風駕

韓詩云星精也

釋文

喬樅謹案毛詩箋云星雨止星見姚鼐曰古晴字本作惺惺亦作星若星辰字自作壘韓詩星精也精明晴之謂也世久以星字當壘辰之壘此詩偶存古字耳胡承珙曰案說文旡雨而夜除壘見也與箋說同日部又云啓雨而晝旡也啓字從日故屬之晝旡字從夕故云夜除壘見鄭意亦以詩之星卽旡字雨止星見之星字當作壘此非以星見釋詩星字蓋四字總言夜晴

以明豫戒倂人令其早駕耳史記天精而見景
星精謂精明與韓詩釋星爲精義同漢書作𣎵
亦作𣎵見索隱○一切經音義云古文𣎵𣎵二形同孟康曰𣎵精明
也是已或據宋本釋文引韓詩作星晴也若經
文之星爲𣎵則與晴字同不當以晴釋星不知
漢初已多用晴少用星故韓詩以今字明古字
謂星卽晴字非訓星爲晴韓非子說林下曰荆
伐陳吳救之軍間三十里雨十日夜星此亦古
晴字之僅存者案姚胡兩說良是

補曹植應詔詩星陳夙駕

蠋蝻

韓詩序曰蠋蝻刺奔女也

後漢書楊賜傳注

蠋蝻在東莫之敢指

韓詩曰詩人言蠋蝻在東者邪氣乘陽人君淫佚之

徵臣子爲君父隱藏故言莫之敢指

同上

喬樞謹案韓說與齊魯同義易林蠱之復曰蠋

蝻充側佞人傾惑女謁橫行正道壅塞後漢書

郎顗傳曰凡邪氣乘陽則虹蜺在日又楊賜傳

曰今殿前之氣應爲虹蜺皆妖邪所生不正之

象詩人所謂蠋蝻者也皆以蠋蝻爲邪氣乘陽

人君淫佚之徵

乃如之人兮懷昏姻也大無信也不知命也

〔韓詩外傳〕傳曰天地有合則生氣有精矣陰陽消
息則變化有時矣時得則治時失則亂故人生而不
具者五目無見不能食不能行不能言不能施化三
月微的而後能見八月生齒而後能食其年體就而
後能行三年腦合而後能言十六精通而後能施化
陰陽相反陰以陽變陽以陰變故男八月生齒八歲
而齟齒十六而精化小通女七月生齒七歲而齟齒
十四而精化小通是故陽以陰變陰以陽變故不肖

者精化始具而生氣感動觸情縱欲反施亂化是以
年壽亟夭而性不長也詩曰乃如之人兮懷昏姻也
大無信也不知命也賢者不然精氣闔溢而後傷時
不可過也不見道端乃陳情欲以歌道義詩曰靜女
其姝俟我乎城隅愛而不見搔首踟躕瞻彼日月悠
悠我思道之云遠曷云能來急時辭也是故稱之日
月也

喬樅謹案毛傳云不知命不待命也韓詩以命
爲壽命之命指年壽而言義與毛異趙懷玉曰
三月微的大戴禮本命篇作徹昀玉篇音徒賢

徒涓二切今大戴禮作徹昀說苑辨物篇作達
眠八月生齒舊本作七月而生齒案下文是八
月此亦當與大戴禮同又而字衍大戴禮說苑
皆無今據刪三年腦合說苑作顙合大戴禮作
瞻合瞻爲目童子精似不當言合或云从月亦
無攷家語本命解作腮合喬樅謂作顙者是也
外傳作腦合亦通

相鼠

人而無儀不死何爲

韓詩外傳一哀公問孔子曰有智壽乎孔子曰然人

有三死而非命也者自取之也居處不理飲食不節
佚勞過度者疾共殺之居下而好干上嗜欲無厭求
索不止者刑共殺之少以敵衆弱以侮強忿不量力
者兵共殺之故有三死而非命者自取之也詩云人
而無儀不死何爲

喬樅謹案文子符言篇載老子之言略同又佚
勞過度者舊脫去佚字度字此據說苑及家語
補之

又曰傳曰不仁之至忽其親不忠之至倍其君不信
之至欺其友此三者聖王之所殺而不赦也詩曰人

而無儀不死何爲

韓詩外傳五王者之政賢能不待次而舉不肖不待
須臾而廢元惡不待教而誅中庸不待政而化分未
足也則有昭穆雖公卿大夫之子孫也行絕禮義則
歸之庶人雖庶民之子孫也積文學正身行能禮儀
則歸之士大夫反側之民牧而試之須而待之安則
畜不安則棄五疾之民上收而事之官而衣食之兼
覆無遺材行反時者死無赦謂之天誅是王者之政
也詩曰人而無儀不死何爲

喬樞謹案外傳此節文字譌脫幾不可讀趙懷

玉校語云遂傾覆之民牧而試之此九字當在
須而待之之上舊脫在則歸之庶人句下案荀
子王制篇云遁逃反側之民職而教之須而待
之外傳本作遂傾覆之民文殊舛錯又須而待
之須字本皆譌作傾攷楊倞云須而待之謂須
暇之而待其遷善也今並據荀子校正遂字當
爲衍文下文反側之民上收而事之官而衣食
之反側二字今從荀子改作五疾語方不繆

人而無止

韓詩曰止節也無禮節也

釋文

喬樅謹案毛傳止所止息也箋云止容止無止則雖居尊無禮節也鄭氏卽用韓義爲解庠釋言云止禮也荀子大畧篇傳曰盈其欲而不愆其止楊倞注亦以止爲禮

人而無禮胡不遄死

〔韓詩外傳〕傳曰在天者莫明乎日月在地者莫明乎水火在人者莫明乎禮義故日月不高則所照不遠水火不積則光炎不博禮義不加乎國家則功名不白故人之命在天國之命在禮君人者隆禮尊賢而王重法愛民而霸好利多詐而危權謀傾覆而亡

詩曰人而無禮胡不遄死

又曰君子有辯善之度以治氣養性則身後彭祖修身自強則各配堯禹宜於時則達阨於窮則處信禮者也凡用心之術由禮則理達不由禮則悖亂飲食衣服動靜居處由禮則和節不由禮則墊陷生疾容貌態度進退趨步由禮則雅不由禮則夷固故人無禮則不生事無禮則不成國無禮則不立王無禮則死亡無日矣詩曰人而無禮胡不遄死

喬樅謹案荀子修身篇文與此同趙懷玉校本云由禮則和節本皆作知節今依荀子文改趨

步舊作移步譌荀子作趨行則此乃趨字誤爲
移也由禮則雅不由禮則夷固本皆作由禮則
夷國譌脫殊甚今依荀子補正荀子云不由禮
則夷固僻違庸衆而野楊注夷倨也固陋也故
人無禮則不生舊本故字譌作政又脫人字不
生作不行有王字屬下句今案行
生
之譌俱依荀子改正

韓詩外傳三詩曰人而無禮胡不遄死爲上無禮則
不免乎患爲下無禮則不免乎刑上下無禮胡不遄
死

韓詩外傳九齊景公縱酒醉而解衣冠鼓琴以自樂
顧左右曰仁人亦樂此乎左右曰仁人耳目猶人何
爲不樂乎景公曰駕車以迎晏子晏子聞之朝服而
至景公曰今者寡人此樂願與大夫同之請去禮晏
子曰君言過矣自齊國五尺以上力皆能勝嬰與君
所以不敢者畏禮也故自天子無禮則無以守社稷
諸侯無禮則無以守其國爲人上無禮則無以使其
下爲人下無禮則無以事其上大夫無禮則無以治
其家兄弟無禮則不同居人而無禮不若遘死景公
色媿離席而謝曰寡人不仁無良左右淫湎寡人以

至於此請殺左右以補其過晏子曰左右無過君好禮則有禮者至無禮者去君惡禮則無禮者至有禮者去左右何罪乎景公曰善哉乃更衣而坐觴酒三行晏子辭去景公拜送詩曰人而無禮胡不遄死

喬樅謹案請去禮三字舊脫今據新序刺奢篇補之

補曹植上責躬應詔詩表曰竊感相鼠之篇無禮遄死之義

干旄

彼姝者子何以告之

韓詩外傳二楚莊王圍宋有七日之糧曰盡此而不
尅將去而歸於是使司馬子反乘闔而窺宋城宋使
華元乘闔而應之子反曰子之國何若矣華元曰憊
矣易子而食之析骸而爨之子反曰嘻甚矣憊雖然
吾聞圍者之國箝馬而秣之使肥者應客今何吾子
之情也華元曰吾聞君子見人之困則矜之小人見
人之困則幸之吾望見吾子似於君子是以情也子
反曰諾子其勉之矣吾軍有七日糧爾揖而去子反
告莊王莊王曰若何子反曰憊矣易子而食之析骸
而爨之莊王曰嘻甚矣憊今得此而歸爾子反曰不

可吾已告之矣軍亦有七日糧爾莊王怒曰吾使子
視之子曷爲而告之子反曰區區之宋猶有不欺之
臣何以楚國而無乎吾是以告之也莊王曰雖然吾
今得此而歸爾子反曰王請處此臣請歸耳王曰子
去我而歸吾孰與處乎此吾將從子而歸遂師而歸
君子善其平已也華元以誠告子反得以解圍全二
國之命詩云彼姝者子何以告之君子善之誠相
告也

喬樅謹案闔字舊皆譌作闕攷公羊宣十五年
傳載楚莊王圍宋事作乘堙堙上城具也外傳

假用闐字因譌作闐耳吾今付此句吾下衍子
字今据趙懷玉校正本刪

載馳

歸唁衛侯

韓詩曰弔生曰唁弔失國亦曰唁也

衆經音義十三

喬樞謹案左傳云齊人獲城堅齊人使風沙衛
唁之服虔注曰弔生曰唁又齊侯唁公子野井
穀梁傳曰弔失國曰唁唁公不得入于魯也此
詩之唁亦據失國言之

大夫跋涉我心則憂

外傳一

韓詩曰不由蹊遂而涉曰跋涉

釋文

喬樞謹案毛傳云草行曰跋水行曰涉攷淮南
修務訓跋涉山川冒蒙荆棘高誘注曰不從蹊
遂曰跋涉故獨犯荆棘冒蒙荆棘卽草行之謂
韓說與毛訓雖微異而義實相成也

又曰魯監門之女嬰相從續中夜而泣涕其偶曰何
謂而泣也嬰曰吾聞衛世子不肖所以泣也其偶曰
衛世子不肖諸侯之憂也子曷爲泣也嬰曰吾聞之
異乎子之言也昔者宋之桓司馬得罪於宋君出於
魯其馬佚而騷吾園而食吾園之葵是歲吾聞園人

亡利之半越王勾踐起兵而攻吳諸侯畏其威曾往
獻女吾姊與焉兄往視之道畏而死越兵威者吳也
兄死者我也由是觀之禍與福相及也今衛世子甚
不肖好兵吾男弟三人能無憂乎詩
心則憂是非類與乎

既不我嘉不能旋反視我不臧我思不遠

〔韓詩外傳二〕高子問於孟子曰夫嫁娶者非已所自
親也衛女何以得編於詩也孟子曰有衛女之志則
可無衛女之志則怠若伊尹於太甲有伊尹之志則
可無伊尹之志則篡夫道二常謂之經變謂之權懷

其常道而挾其變權乃得爲賢夫衛女行中孝慮中
聖權如之何詩曰旣不我嘉不能旋反視我木或從
毛改我
爲爾不臧我思不遠

案外傳所謂衛女得編於詩當卽指載馳篇故下
引是詩之詞蓋禮諸侯夫人父母終惟得大夫問
於兄弟義不得歸許穆夫人欲歸國而唁其兄是
以許人尤之而轉責其大夫之穉且狂四章又言
我遂往無我有尤違禮徇情咎人怨已此高子所
以疑其不得編於詩也然而閔國之亡憂民之困
其志則可悲卒止於義而守其防孟子以爲行中

孝慮中聖不虛矣又列女傳三載衛女事甚詳亦言女作載馳可証趙舍人懷玉云此衛女不知是詩何篇所引載馳未可謂卽指此蓋攷之不審耳許人尤之

薛君韓詩章句曰尤非也

文選杜五盧諶贈劉琨詩注

喬樅謹案毛傳訓尤爲過釋文云尤本亦作訖攷論語憲問不尤人鄭注云尤非也文選陸士衡文賦練世情之常尤注亦云尤非也皆用韓詩訓義

控于大邦

韓詩曰控于大邦赴也

衆經音義九

喬樅謹案毛傳云控引鄭箋云今衛之欲求援引之力助于大國之諸侯與韓詩訓控爲赴義別列女傳許穆夫人傳曰如使邊境有寇戎之事惟是四方之故赴告大國詩之控于大邦卽赴告大國之謂也鄭注儀禮既夕云赴走告也其義是已

百爾所思不如我所之

韓詩外傳二楚莊王聽朝罷晏樊姬下堂而迎之曰何罷之晏也得無饑倦乎莊王曰今日聽忠賢之言

不知饑倦也樊姬曰王之所謂忠賢者諸侯之客歟
中國之士歟莊王曰則沈令尹也樊姬掩口而笑王
曰姬之所笑何也姬曰妾得於王尙湯沐執巾櫛振
衽席十有一年矣然則未嘗不遣人之梁鄭之間求
美人而進之於王也與妾同列者十人賢於妾者二
人妾豈不欲擅王之寵哉不敢私願蔽衆美欲王之
多見則娛今沈令尹相楚數年矣未嘗見進賢而退
不肖也又焉得爲忠賢乎莊王曰朝以樊姬之言告
沈令尹令尹避席而進孫叔敖叔敖治楚三年而楚
國霸楚史援筆而書之於策曰楚之霸樊姬之力也

詩曰百爾所思不如我所之樊姬之謂也

衛風

淇澳

綠薄猗猗

韓詩曰薄篇莢也

釋文

喬樅謹案毛傳竹篇竹也釋文云竹韓詩作薄
石經同臧氏玉林以石經爲魯詩非也攷洪适
隸釋載石經魯詩殘碑言其間有齊韓字蓋取
三家異同之說則陸所云石經同者亦指石經
所載韓詩之異文非謂魯詩同韓作薄也李匡
父資暇錄云薄音篤篇竹攷說文薄水篇莢也

從草水毒聲讀若督篇竹乃篇莠之假借耳

有邨君子

韓詩曰邨美貌也

釋文

喬樅謹案邨毛詩作匪釋文云本又作斐同芳尾反文貌今攷廣韻邨好貌好亦卽美之義也如切如磋如琢如磨

韓詩外傳二閔子騫始見於夫子有菜色後有芻豢之色子貢問曰子始有菜色今有芻豢色何也閔子曰吾出蒹葭之中入夫子之門夫子內切之以孝外爲之陳王法心竊樂之出見羽蓋龍旂旃裘相隨

心又樂之二者相攻胸中不能任是以有菜色也今被夫子之教淺深又賴二三子切磋而進之內明於去就之義出見羽蓋龍旂旃裘相隨視之如壇土矣是以有芻豢之色詩曰如切如磋如琢如磨

又曰傳曰雩而雨者何也曰無何也猶不雩而雨也星墜木鳴國人皆恐何也是天地之變陰陽之化物之罕至者也怪之可也畏之非也夫日月之薄蝕怪星之黨鬼風雨之不時是無世而不嘗有也上明政平是雖並至無傷也上闇政險是雖無一無益也夫萬物之有災眚如斯可畏也曰何謂人妖曰枯耕傷

稼枯耘傷歲政險失民田穢稼惡糴貴民饑道有死人寇賊並起上下乖離鄰人相暴對門相盜禮義不循牛馬相生六畜作妖臣下殺上父子相疑是謂人妖是生於亂傳曰天地之災隱而廢也萬物之怪書不說也無用之變不急之災棄而不治若夫君臣之義父子之親男女之別切瑣而不舍詩曰如切如瑳如琢如磨

又外傳九傳曰堂衣若扣孔子之門曰某在乎某在乎子貢應之曰君子尊賢而容衆嘉善而矜不能親內及外已所不欲勿施於人子何言吾師之名焉堂

衣若曰子何年少之絞乎子貢曰大車不絞則不成其任琴瑟不絞則不成其音子之言絞是以絞之也堂衣若曰吾始以鴻之力今徒翼耳子貢曰非鴻之力安能舉其翼詩曰如切如磋如琢如磨

喬樅謹案今俗本韓詩外傳磋作磋非又太平御覽七百六十四引韓詩曰如磨如錯又引方言曰錯鏹牙名也說文曰鏹錯銅鐵也宋綿初云磨錯當上下互易以諧韻韓詩文本作如錯如磨今本外傳引作琢者後人順毛所改東哲補亡詩曰華篇粲粲門子如磨如錯其卽用韓

詩之語歟

瑟兮僾兮

韓詩曰僾美貌

釋文

喬樅謹案韓詩訓僾爲美蓋以爲嫺字之假借
賈子新書傳職篇云明僾雅以道之文又道術
篇云容志審道謂之僾反僾爲野僾與野對則
義當爲嫺雅故韓訓爲美貌

赫兮宣兮

上宣顯也

釋文

喬樅謹案宣毛詩作咺傳云威儀容止宣著也

與韓同義爾雅釋訓作烜陸氏音義云烜者光明宜著是魯詩雖文異而義皆同廣雅釋詁曰烜明也明猶云顯亦卽宜著之謂

綠薄如簣

韓詩曰綠薄如簣簣積也○薛君曰簣綠薄盛如積

也

文選西京賦注

案文選注引簣積也乃韓嬰傳下引薛君曰則韓詩章句也王氏詩攷脫薛君曰三字是以內傳與章句混而爲一矣

喬樅謹案毛韓並訓簣爲積是以簣爲積之假

借陳啟源曰平子西京賦芳草如積正用斯語
攷平子皆用魯詩然則魯詩之文殆作藁竹如
積歟

考盤

考盤在干

韓詩曰干堦墉之處也

釋文

韓詩曰考盤在干地下而黃曰干

文選左思吳都賦
劉公又讀詩

記六

案文選注引干字訓與釋文不同蓋內傳也盤毛
詩作槃干毛詩作澗

喬樸謹案毛傳云山夾水曰澗小雅秩秩斯干
傳曰干澗也是干澗二字古通易鴻漸于干釋
文引荀爽王肅注並云山間澗水也韓詩以干
爲磽确之處者干亦里爲山澗厓岸之地
故以磽确言之謂澗薄者也詩邱中有麻
毛傳以邱中爲磽處與此同義又訓地下
而黃者胡承珙疑潢字之誤潢汙者停水
之處小雅正義鄭君易注云干者水傍故停
水處卽其義也

考盤不阿

韓詩曰

喬樅言朱文選西都注引韓詩曰曲景曰阿景
字乃京之誤阿經音義云謂山曲隈處也

顧人之飽

韓詩曰飽美貌

釋文

喬樅謹案飽毛詩作邁傳云寬大貌韓詩訓飽
爲美貌與毛傳寬大義相近邁字當卽飽之段
借廣韻飽美也義本韓詩鄭箋以邁爲饑意段
玉裁謂邁卽窵之段借漢書楊王孫傳窵木爲
匱服虔曰窵空也淮南子窵者王浮注窵空也

讀如科條之科是適欵古音同其說是也然段
並以毛訓寬大爲亦取空中之意則義近牽強
矣

碩人

巧笑倩兮美目盼兮

韓詩曰倩蒼白色盼黑色也

釋文

喬樅謹案釋文倩本又作倩韓詩倩或亦爲倩
字故以蒼白色之又文選蜀都賦劉淵林注
引張揖曰靚謂粉白黛黑也郭璞注上林賦訓
同則倩當與靚通然倩字自是倩之假借毛傳

倩好口輔說文倩人美字也人之美貌爲倩笑
之好貌亦爲倩盼毛傳云白黑分說文訓與毛
傳同白黑分則臚之黑色益顯故韓詩以黑色
言之耳

朱幘儵儵

補玉篇人部詩云朱幘儵儵盛貌也

喬樅謹案儵儵毛詩作鑣鑣傳云盛貌攷鑣字
訓爲馬銜是鑣乃儵之段借玉篇据韓詩今文
故字作儵儵

大夫風退

韓詩曰退罷也

釋文

喬樅謹案毛傳云大夫未退君聽朝於路寢夫人聽內事於正寢大夫退然後止義引玉藻云君日出而視朝退適路寢聽政使人視大夫大夫退然後適小寢釋服適小寢卽是罷也釋文引禮記云朝廷曰退退朝亦曰罷朝此大夫夙退者謂且早罷歸也

施眾濊濊

韓詩曰濊濊流貌

釋文

喬樅謹案毛傳眾魚詈濊施之水中釋文濊下

又引馬融云大魚網目大豁豁也說文云礙流也李黼平曰按如馬說則釋罟而已河流盛大亦非一罟之所能礙韓詩云流貌得之蓋謂罟初入水與水濺濺俱流也得韓說而毛義益顯矣胡承珙曰詩此句本承北流活活言活活之流施罟則於水似礙說文此語最善形容蓋與毛傳所謂施之水中者皆兼罟與水言之馬瑞辰曰濺濺蓋施之水中者有礙水流之貌毛傳施之水中卽有礙流之義說文正善釋毛義耳韓詩云流貌與毛詩義亦相成施罟水中有礙水

流而水仍流實似礙而不礙也

鯁鮓鮓鮓

毛詩釋文發發韓詩作鮓鮓

喬樅謹案毛傳云發發盛貌釋文引馬融云魚著網尾發發然發蓋卽鮓之省文又說文鮓鮓鮓鮓從魚友聲段氏注以篇韻無鮓字爲疑馬瑞辰曰友發古通用據集韻鮓或作鮓是鮓鮓卽韓詩鮓鮓之異文

庶姜輶輶

韓詩曰輶輶長貌

釋文

喬樅謹案轍毛詩作孽呂氏春秋過理篇宋王
築爲孽臺高誘注云孽當作轍孽與轍音同詩
云庶姜轍轍高長貌也高用魯訓與韓義亦同
是三家文皆作轍矣

庶士有桀

韓詩曰桀健也

釋文

喬樅謹案桀毛詩作謁傳云謁武壯貌義與韓
詩同伯兮詩邦之桀兮毛傳云桀特立也特立
卽健之義健亦武壯之貌謁說文云去也毛詩
謁字蓋皆偁之段借偁桀音義相近廣雅釋詁

二偁健也一切經音義六引字林偁健也毛詩
伯兮偁兮傳云偁武也王篇人部偁武貌詩曰
伯兮偁兮文選高唐賦序注引韓詩云偁桀健
也是偁偁桀二字義近通假之證

氓

氓之蚩蚩

韓詩曰氓美貌

釋文

喬樅謹案毛傳云氓民也韓以氓爲美貌者據
詩言蚩蚩故云然耳小爾雅廣言曰蚩戲也一
切經音義二十三引倉頡云蚩笑也文選阮籍

咏懷詩注又古詩十九首注兩引說文蚩笑也
李善云蚩與蚩同說文無蚩字欠部蚩下云蚩
蚩戲笑貌蚩當卽蚩之或體蚩蚩爲戲笑貌此
婦人追本男子誘已之時與已戲笑已悅之而
以爲美也又毛傳云蚩蚩敦厚之貌正義申毛
謂顏色敦厚已所以悅之是亦以氓之蚩蚩爲
美詞

將子無怒

薛君傳詩章句曰將辭也

文選廿
泉賦注

泣涕漣漣

補玉篇水部詩曰泣涕漣漣淚下貌

喬樅謹案毛詩傳箋漣漣二字均無訓義玉篇所釋是用韓詩之說

履無咎言

韓詩曰履幸也釋文

喬樅謹案履毛詩作體謂卦兆之體也禮記引詩體亦作禮鄭注訓履爲禮與毛詩義異禮注多用齊詩韓詩訓履爲幸者郝懿行曰爾雅履福也幸者趨吉而免凶亦福之意喬樅謂漢書伍被傳注幸非望之福也履義訓福故引申旁

通之其義亦得訓幸耳

吁嗟女兮無與士耽

韓詩外傳二孔子曰口欲味心欲佚教之以仁心欲安身惡勞教之以恭好辯論而畏懼教之以勇目好色耳好聲教之以義易曰艮其限列其夤危薰心詩曰吁嗟女兮無與士耽皆防邪禁佚調和心志

喬樅謹案心欲安句安字舊譌作兵語不可解當是安字之誤今爲校正

靡室勞矣

韓詩曰靡共也

易中孚釋文

喬樅謹案此詩靡字毛公無傳鄭箋云靡無也
無居室之勞言不以婦事見困苦然詳詩下文
夙興夜寐靡有朝矣言早夜操作已非一朝則
上文三歲爲婦靡室勞矣當言三歲之中同居
共苦方與下語氣一貫自宜以靡訓共其義始
合又列子說符篇強食靡角勝者爲制注引韓
詩外傳曰靡共也言相共角力以求勝也外傳
疑內傳之譌

竹竿

檜楫松舟

補環氏吳紀孫皓嘗問詩云汎彼柏舟惟柏中舟乎

張尚對曰詩言檜楫松舟則松亦中舟也三國志張紘傳裴松

之注

喬樅謹案張尙父紘從濮陽閻受韓詩見於吳

書知尙於詩當亦習韓家也

芄蘭

垂帶萃兮

韓詩曰萃垂貌釋文

喬樅謹案萃毛詩作悻傳云垂其紳帶悻悻然有節度是亦以悻爲垂貌悻字蓋萃之叚借萃

說文云草聚貌文選籍田賦注引蒼頡篇云蕊聚也是華蕊義通說文又云蕊垂也從蕊系聲廣雅釋詁二蕊聚也集韻云蕊或从木作蕊左氏哀十三年傳佩玉蕊兮蕊謂佩玉垂貌也說文垂草木花葉垂象形草木花葉皆以聚故而下垂故華蕊又並爲垂貌

能不我狎

〔毛詩釋文〕甲韓詩作狎

喬樅謹案毛詩能不我甲傳云甲狎也甲狎古今文惠氏棟云釋文引徐邈音甲爲胡甲反匡

謬正俗曰甲雖訓狎自有本音不當便讀爲狎
其說非也漢儒訓詁音義相兼尙書多方甲于
內亂鄭王皆以甲爲狎古文省少以甲爲狎遂
有狎音非假借也經傳中惟徐氏釋音獨得古
人之義小顏輒斥以爲非何也

伯兮

伯兮偈兮

韓詩曰偈桀挺也疾驅貌

文選十九宋玉高唐賦注

玉篇人部偈武貌詩曰伯兮偈兮

喬樅謹案偈毛詩作謁訓爲武貌謁字卽偈之

通段玉篇所引雖不言何詩然偈字與文選注引韓詩文同則其爲韓詩無疑也段玉裁據說文仡勇壯也引周書仡仡勇夫謂竭爲仡之段借然不如從韓詩偈字尤爲邦礪

邦之傑兮

補玉篇人部桀英傑詩曰邦之傑兮傑特立也

喬樅謹案傑字毛詩作桀古文之假借三家今文作傑字爲正衆經音義五引詩亦作邦之傑今與玉篇同皆據韓詩之文

伯也執殳爲王前驅

李善文選注二韓詩曰伯也執殳爲王前驅

西京賦注

喬樅謹案周禮司戈盾云祭祀授旅賁殳說文云殳以投殊人也禮殳以積竹八觔長丈二尺建于兵車旅賁以先驅此詩言伯也執殳爲王前驅胡氏紹曾謂伯以衛人仕於王朝居旅賁之官是也

焉得誼草言樹之背願言思伯使我心痠

韓詩曰焉得誼草言樹之背願言思伯使我心痠○

薛君曰誼草忘憂也

文選廿五謝惠連西陸遇風獻康樂詩注

喬樅謹案文選陸士衡贈從兄車騎詩注又引

韓詩曰焉得諛草言樹之背與毛詩文同諛誼
古相通謝惠連詩曰積憤成疾痗無萱將如何
注引韓詩又作萱草此順謝詩所作字耳其引
薛君章句字仍作諛云萱與誼通又說文云憲
令人忘憂之草也詩曰安得憲草重文殘云或
從煖萱云或從宜諛誼皆以同聲通假

有狐

心之憂矣之子無裳

〔韓詩外傳三〕昔者不出戶而知天下不窺牖而見天
道非目能視乎千里之前非耳能聞乎千里之外以

已之情量之也已惡饑寒焉則知天下之欲衣食也已惡勞苦焉則知天下之欲安佚也已惡衰乏焉則知天下之欲富足也知此三者聖王之所以不降席而匡天下故君子之道忠恕而已矣夫處饑渴苦血氣困寒暑動肌膚此四者民之大害也害不除未可教御也四體不掩則鮮仁人五藏空虛則無立士故先王之法天子親耕后妃親蠶先天下憂衣與食也詩曰父母何嘗心之憂矣之子無裳

案此錯引鴛羽有狐二詩是韓氏以有狐爲貧困之作也